

萬有文庫

第二集七種

王雲五主編

誠意伯文集

(五)

劉基撰

何鍾編校

商務印書館發行

誠意伯文集

(五)

劉基撰

何鏜編校

國學基本叢書

誠意伯文集卷之十四

七言古詩

爲祝彥中題山水圖

高軒玲瓏不受暑。半幅輕綃宿烟雨。白屋素壁生空明。似聞水聲繞庭宇。松髯拂天藤蔓垂。枯根瘦石相因依。寒濤不驚虎兕臥。嵐翠欲與蛟虬飛。空江悠悠一漁艇。渚白沙明萬魚靜。武陵桃花何處尋。落日微風片帆影。

徐資深華山圖

華嶽插天七千丈。丹崖翠壁開仙掌。壁間擘出黃河流。大禹以之分九州。河流袞袞赴溟漲。華岳拔出天河上。雲宮霧窟疑本無。石室金臺儼相向。玉泉高通玉井津。中有蓮實如車輪。世人肉食未羽化。可望不得聊相親。高堂晚晴圖畫展。眼明一見心自遠。世間塵土今紛紛。吾當拂衣臥山雲。

永康胡元鼎白雲樓

少年辭家往京國。蓬根一斷無消息。有時長想白雲飛。江海茫茫淚霑臆。歸來拜母悲且喜。悔作他鄉遠遊子。卻起高樓對白雲。綵服翩翩足甘旨。昔時望雲煎百慮。今日看雲美無度。卻憶天涯望雲日。平生心事從此畢。

贈醫士黃元之

先生軒轅之子孫。手提萬物生死根。神功微妙不可狀。能使元氣回遊魂。篋中永芽抽粟粒。丹光照耀三彭泣。銜珠不受脩蛇報。采藥常令白猿拾。結廬幾歲吳山阿。赤松玄俗時相過。更向蓬萊下神水。併與人世清煩痾。

中峯永先和尚醉墨圖

老先行腳遍天下。五湖七澤胸中吞。淋漓醉墨落人世。恍惚目擊瀟湘存。蒼梧飛龍去不還。洞庭赤沙流水渾。九疑竹枝餘淚痕。澧蘭沅芷化蕭艾。古木雨炫寒烟昏。雲帆縹緲向何處。波浪瀕洞驕魚鼈。我生胡爲羈旅間。感時覩物生愁怨。還君此畫歌一曲。悲風慘淡來崑崙。

夜聽張道士彈琴 道士字君度

白澗含光月照席。梅花入簷珠的皪。蕊宮道士彈七弦。明星在樹霜滿天。鏘如暗泉發幽竇。悄若空山叫哀狹。霧雨寒吹松柏響。波濤怒激蛟龍鬪。神奔鬼恠入杳冥。鸞孤鶴寡風冷冷。湘娥宵攀竹枝泣。紫鳳曉啄梧桐鳴。悽悽欲斷還復續。啼鴛一聲春草綠。砉然清商行素秋。落葉灑地蟲啾啾。擁衾聽之消百慮。夢逐行雲自來去。九疑連天洞庭遠。海闊煙深不知處。蕊宮道士聽我語。世無子期誰識女。桑間濮上方施行。白雪陽春棄如土。

辛卯仲冬雨中作二首

江城積陰愁玄冬。千家萬家雲水中。烏啼黃昏鴈叫夜。鼓角慘澹愁悲風。青燈無光掩關坐。飢鼠相齧啼

過我讀罷殘書有所思。凍雨霏霏淚交墮。
歲云暮矣風蕭蕭。木葉脫落惟空條。雲濃雨細白日短。慘慘不辨昏與朝。雨中行人足斛觥。去與公家製戎服。中原豺虎正橫戈。天寒風急奈爾何。

悲杭城

觀音渡頭天狗落。北關門外塵沙惡。健兒披髮走如風。女哭男啼撼城郭。憶昔江南十五州。錢塘富庶稱第一。高門畫戟擁雄藩。豔舞清歌樂終日。割臚進酒皆俊郎。呵叱閑人氣驕逸。一朝奔迸各西東。玉帶金杯散蓬華。清都太微天聽高。虎略龍韜緘石室。長夜風吹血腥入。吳山浙河慘蕭瑟。城上陣雲凝不飛。獨客無聲淚交溢。

夏夜台州城中作

江上火雲蒸熱風。欲雨不雨天蒼蒼。良田半作龜兆坼。秔稻日夕成蒿蓬。去年海賊殺元帥。黎民星散劫火紅。耕牛剝皮作戰具。鋤犂化盡刀劍鋒。農夫有田不得種。白日慘淡衡茅空。將軍虎毛深玉帳。野哭不入轅門中。健兒鬪死烏自食。何人幕下矜奇功。今年大軍蕩淮甸。分命上宰壓元戎。舞干再見有苗格。山川鬼神當效忠。胡爲早魃還肆虐。坐令毒沴傷和冲。傳聞逆黨尙攻剽。所過丘壠皆成童。闔司恐畏破和議。斥堠悉罷雲邊烽。殺降共說有大禁。無人更敢彎弧弓。山中悲啼海中笑。蜃氣繞日生長虹。古時東海辟孝婦。草木枯瘁連三冬。六月降霜良有以。天公未必長瘖聾。只今幅員廣無外。東至日出西太蒙。一民一物吾肺腑。仁者自是哀鰥悁。養鼻廬鳳天所厭。誰能抗疏回宸衷。夜涼木末掛河漢。海嶠月出光玲瓏。

仰視皇天轉北斗。嗚呼愁歎何時終。

老病歎

我身衰朽百病加。年未六十眼已花。筋牽肉顫骨髓竭。膚腠剝錯瘡與癩。人皆愛我饋我藥。暫止信宿還萌芽。肺肝上氣若潮湧。舊劑再歡猶淋沙。有眼不視非我目。有齒不齧非我牙。三黃苦心徒自療。五毒浣胃空矛戈。因思造物生我日。脩短已定無舛差。瑇瑁不能使之少。盧秦焉能使之加。攻犀鹽朽各有分。鳧悲鶴悼何繆耶。不如閉戶謝客去。有酒且飲辭諠譁。

題松下道士攜琴圖

道士抱琴松下行。松風入耳清涼生。石梁苔滑不可上。潭水冷冷學琴響。琴有意兮水無心。水中有龍能聽琴。琴聲淒斷水流咽。月滿空山落松雪。

錢王箭頭篇

鴟夷遺魂拗餘怒。欲取吳山入江去。雷霆劈地水羣飛。海門扶胥沒氛霧。英雄一怒天可回。肯使赤子隨蛟鮓。指揮五丁發神弩。鬼物辟易腥風開。三百年來人事改。濤落沙平箭空在。石梁飲羽未足誇。蜀國三岸漫欺紿。近聞黃河水亂流。青徐一半悲魚頭。安得壯士斡地軸。爲拯斯民塗炭憂。

次韻和石末公七月十五夜月蝕詩

招搖指坤月望日。大月如盤海中出。不知妖恠從何來。恟恍初驚天眼眈。兒童走報開戶看。城角啣鳴聲未卒。蟾逃兔遁漠無蹤。壁隕珠沉一何疾。丈夫愕視隘街巷。婦女喧呼動圭筆。輝輝稍辨河漢沫。耿耿漸

明荒冢潦。百官袍笏羣吏超。伐鼓撞鉦仍設鞞。赤水難令罔象求。澠池莫效相如叱。升簷變閣到空曠。璫掩氛祲殊靡畢。廣寒桂樹劫火燼。借問嫦娥有何術。今年下土困炎沴。草木焦枯野蕭瑟。萍號喝死龍甲歎。赤標當衢掛萍實。光芒照灼玄武爛。誰復瑣瑣憐蚌鷓。今夜慝作最差異。天道幽微孰能詰。太陰配日宰臣象。無乃常刑多縱軼。近來營壘徧宇內。羽林慘澹空鐵鎖。荒郊廢市何所見。夔罔蛟蛇兼蚤蠹。此皆在地不在天。未若蝦蟇狡而獷。黃文結鄰上訴帝。賜以小戎驂牡隲。剖墓洗魄還月光。再起咎繇明典秩。返蟾歸兔復織阿。萬古游塵避清蹕。

再用前韻

虞淵給劄納歸日。金樞吐月相承出。初離積水看若飛。稍映微雲盼猶眈。是時蓐收肇視政。莎雞振羽鳴蜩卒。姮娥靚粧覲玉帝。坎軻中途嬰禍疾。旅人苦熱愛清涼。快觀光輝滿蓬華。願開寶鑑照覆盆。豈擬瘴塵昏點漆。隋珠慙固重革櫃。和璧嗟蒙韎韞韞。吳罡樹折不自謀。織阿馬弱無人叱。三足蟾驚入坎窪。八竅兔走羅罝畢。園灰破暈謾傳方。屑玉補凹空著術。雷公駭懼罷靈鼓。湘女幽憂舍鳴瑟。故老謂是蝦蟇精。潛伏姦妖營口實。羲和尸位罔聞知。可以人而不如鷓。往歲威弧弛其殼。蛇豕陸梁誰復詰。高牙大纛擁藩垣。腸斷吞聲受陵軼。江淮洶湧湖浙沸。骸骨成山連鬼鎖。萬姓喁喁釜裏魚。百官蠢蠢禪中蠹。黃茅白葦棄賢良。赤紱玄裳寵獍獠。昊穹示變盍警畏。惟德動天天有隲。況今旱魃又爲厲。東作西成不平秩。安得緘辭伏閭闔。聖主如聞應駐蹕。

聽蛙

繞舍荒池底。且鮒蟄蛙齊。候鳴雷社已。知地氣上如炊。更覺石泉流若瀉。舉頭玉燭煥陽明。蹋足汗泥悲
土直。半夜條風入綺牕。清晨細雨霏簷瓦。梁間紫燕舞參差。枝上黃鸝語悲姪。播形肖貌均有生。感氣傷
情孰瘡癩。初聆衙衙雜更鼓。漸聽嘈嘈成侈多。猶持堅白較同異。似坐狙丘談稷下。村童叫噪鬻學究。悍
婦勃磈喧姊妹。西域胡僧彈般若。齊東老生誇炙輠。逸帆觸岸靡兼葭。醉客罵筵投蓋罌。叻咬誰辨驃兒
哇。虢書乍開寶叟囁。怒牙嚼齧悸羅吞。寤言詰屈驚宜櫛。徒夸楚使能冒齊。未讓秦巫上詛芋。兜離僂佻
紛飄縷。帝樂虛張洞庭野。虞夔奚暇調笙磬。周瞽曷由分鄭雅。旅人懷憂實無寐。遭此彊聒胡爲者。得非
作姦謀蝕月。無奈聚訟騰謹設。昔聞周公立典教。軻氏專司鞠灰灑。常疑聖人茂育物。獨向微蟲少寬假。
乃今知其非瑣屑。欲問官司乞餘燧。鳳皇驚鴛聲苦希。白雪陽春和偏寡。蚊蠅蚤蟲多於沙。鑽啞暗鳴紛
醜醜。蝦蟇幸不含毒螫。何苦嘔號爭肥嗣。烏鳶逐響蛇聽音。寧願入腹生癢痕。賦詩卻笑柳柳州。忍使腥
臊辱殖鮓。

贈道士蔣玉壺長歌

先生清如玉壺冰。神閑志一精粹凝。玄黃健順六子承。和氣坱圠籠穢澄。冲虛澹澹廓以弘。冥茫沕穆怙
無能。火鳥入海陰液升。鶉蛇受約不敢騰。束縛龍虎如寒蠅。虛無黃帝所憑。四方上下齊鉤繩。北幽羅
鄴對朱陵。女夷鼓歌王母應。瓊宮夜半張華燈。金葩碧葉紅毳氎。素霞鬱瀟玄雲烝。沆瀣厭浥淪泉興。牽
牛織女來相仍。用之不滅亦不增。地官錫福天官徵。老蚌迸殼驪珠升。太一象輿驂八鵬。翼以六蜺前五
騰。風輪蕭蕭生夏凌。參旗九旂莅緄縢。二八青蛾美目睒。翠蕤交翟翺翾翾。屬車九九如連繩。最後雷輶

子所乘。流蘇勃窣垂鏤膺。煊爛駁馬駟駱。蹴霞踏霧碎綺綾。天津閣道轆轤輻。歸來瑤臺十二層。月光照耀玻璃棚。下視瀛海波濤砵。龍宮蜃窟寒兢兢。歸塘暘谷清可憑。鱗甲鏡瑩鰓與鯨。湘妃鼓瑟冰絲絙。攢金憂玉萬穴灑。琅玕風吹殷峻嶒。琉璃雲母龜貝朋。琳房璧甍理階陞。素鸞振迅霜女扔。璇題瑣牕肅。蕭蕭洞晃矚。朗眩遙瞪。瘁肌砭髓魂欲斃。忽然浮空墮杳暮。颺馳電耀羽脫肱。天衢阻遐世網罟。昏昏日月敲炎蒸。句曲之山宰罔礧。楓杉檜柏櫛桂枿。蘅蘭杜若蕙茝琴。緣岡被嶺羃礧。大地浪井瀑練滿。萍瀕繡繪芙蓉淺。蠶虬蝻蚪千年藤。纏絡薜荔縣鬚鬢。敷芳發馥菲芬芳。獮獠獮鷗蒼鷹。攀援欻砮巖。崩寒蟄蟪蛄蟬。犯蠶嵐餐鶯飲喧。岷先生皮冠衣絳繒。桃枝七尺穿虺臙。三茅真君共嗟稱。星根絕頂時同登。黃斑黑虎陟降凭。石罅甘漿溢若澗。神芝吐燄如篋簪。食時動機保不薨。驅斥瑇瑁除痕癢。昨光照座生紫稜。舉觴引滿鯨喉漿。解后見之喜莫勝。揚眉抵掌開蒙顛。人生嘉會安得恆。靖恭正直天所朽。作詩持贈匪妄詭。

古歌三首

紅葵高花高以妍。清晨方開夕就焉。美人迢迢隔山水。可望不見心茫然。花開花落日復夜。惟覺新年非故年。人生百歲花一度。何不作樂令人憐。

舊花欲落新花好。新人少年舊人老。佳人見此心相憐。舉觴勸我學神仙。我聞神仙亦有死。但我與子不見耳。祗言老彭壽最多。八百歲後還如何。

雙燕雙飛入我堂。銜泥養雛何太忙。養得雛成卻飛去。雙燕雙飛復如故。東園桃李春萋萋。日華烘露生

紫霓一朝實熟付人採。葉枯枝折空成蹊。

道士周玄初鶴林行

鶴林道士軒轅徒。以颺爲輪雷爲輿。開山養鶴作騏驎。上下二儀周六虛。雛成洗髓扶桑窟。縞練羽毛鏐鐵骨。聲飄碧落玉清揚。影拂太微雲滅沒。永夜月明風滿林。竹柏戛擊笙簫音。云是旌陽許縣令。蹠蹠佩劍來相尋。靡萍西枝搖倒景。借去林間兩丹頂。伐蛟北海奠玄冥。斬蜃南訛封浪井。上窮列缺旁九圍。卻過度朔山中歸。歸來贈我桃樹枝。朱衣赤郭手所持。令我鞭龍扶虓虎。攝縛臊魃如奴虜。授我堯時松子訣。轉晴出電噓成雨。鍾山秀色連冶城。百花繞屋風泠泠。焚香獨坐誦真誥。墜露點滴流華星。土伯駿奔從號令。鶴鳴聞天空谷應。寥陽寶殿歌步虛。河漢當窗回斗柄。嗟子衰朽雜病攻。盈顛素髮吹秋蓬。空餘硬骨如瘦鶴。因子致意浮丘公。

送李叔允脩撰致仕歸鉤州

憶昔西京祖二疎。都門供帳羅長衢。金張許史集軒蓋。彈琴鼓瑟吹笙竽。頽顏鶴髮映霄漢。蒼松翠柏紅珊瑚。道傍觀者皆慨歎。此士足爲天下模。先生胸蟠五車書。雍容進退安且徐。披香朝侍紫宸案。珥筆畫入承明廬。引經論奏動天聽。天語親授非臚句。老年謝事歸里閭。召見特許兒童扶。臨軒賜膳侑金幣。尙食供奉黃門趨。夜來微雨清郊墟。緗黃漚柳鶯相呼。風吹暖烟逗白日。露濕芳草留驪駒。雖無旨酒嘉穀蔬。短歌一曲聊踟躇。浮雲流水無根蒂。人生何者爲驩虞。嵩高少室衆美奧。素石如玉泉如酥。時清四野樂耕稼。雉鳴麥秀千華敷。親朋會合各慰意。況有令子知勞劬。揮金買酒泳聖澤。怡情之外吾何須。西飛

鴻鴈東飛魚。相思迢迢天一隅。贈言有盡意不盡。努力善保千金軀。

松葉酒歌寄梁安宅

道人贈我松葉酒。味似瓊漿色瓊玖。嚙之骨爽神魂清。令我壽同金石久。我生踈懶無所能。瘦皮黏骨危峻嶒。病來啖藥猶啖水。夢寐恍惚風中燈。常聞徂徠有嘉木。玄醴滌濯黃露沐。上有兔絲揚翠旂。下有茯苓蹲白鹿。咀華嚼葉燕以津。歲久定化腸爲筋。便從僂佺覲黃帝。身騎肉角青騏驎。我欲求之百憂集。滿眼蚊蠅隨出入。跋鳥箭逝織阿急。日暮空瞻鄧林泣。道人此酒還有方。我欲與子同徜徉。世上神仙亦何限。留俟辟穀應未晚。

枯樹圖

道傍古樹半身枯。白蟻穴根蟲穴膚。風摧雨撼霜雪凍。斷石臃腫無人扶。憶昔勾芒肇初政。百卉騰達隨呵噓。新柯荏苒舊柯壯。霧露膏沐光如濡。黃鸝翡翠語嬌滑。乘扈戴勝鳴相呼。白鶴來巢鹿止蔭。匠石愕睨爭歎譽。寧知憂患生旦夕。野火倏忽起不虞。燎原烈焰難嚮邇。孰問柞櫟杉與櫟。枝燔葉煇根半赤。朽腐楠液非時須。山林搖落歲方晏。聊以薜荔爲衣袂。嗚呼廣廈棟梁具。委棄草莽同新葛。皇天未必替生意。更盼玉燭回暘烏。

正月十五夜燈花大開作

燈花如螢紅且綠。燈花有意憐幽獨。夜寒衾冷漏聲遲。臥看瓊枝綻金粟。涼蟾入戶四壁空。地爐宿火天無風。祥煙抱日麗碧落。驪龍吐珠歎紫虹。人言此花專報喜。勞生短髮絲垂耳。无望之福非所希。無事惱

懷吾足矣。呼童添油引良夜。九衢燈月光相射。漫沾濁酒餉離魂。豈必忘憂惟樹萱。

爲韓克銘題書石鼎聯句圖

軒轅道士軒轅孫。昔隨飛龍陟崑崙。乘騎六氣遨乾坤。上窮混沌無涯門。下扶若木扶桑根。旋雷舞電訛
晨昏。批蹴虎豹號帝閭。搥擊河鼓牛騰騫。攜虹織輝絢澤原。三足老鳥不敢噉。迷離缺兔駭且奔。羲和籲
號訴至尊。譎降下土營丘樊。結喉長頸古貌存。如鶴如鵠如龍蜿。詰屈不作人間言。涕唾落地生蘭蓀。驅
叱碣石歸河源。蜚廉屏翳雙挾幡。驚捩象齒愁育賁。山玄水蒼琮瑋璫。離羅瓘錯輝熒燉。笙鏞琴瑟篪與
壎。五音翕釋珠瀉盆。吹爲栗烈呵爲暄。扑扶罔象笞鼉鼉。饑鱗辟易徙厥屯。束縛豨魃魑魍。魂乘昇赤郭
充朝殮。妙用歛忽無留痕。嗟哉二子爾曷寃。如井谷鮒當化鯉。嚶嚶草蟲呼阜攀。欲與螻蛄語涼溫。不知
風靈掣牆藩。江騰海躍喬嶽翻。鬼物喘汗相濡敷。爽靈漂搖失所蹲。做芻夢寐精魄昏。低頭拜代饗再論。
陽春二月花滿園。掩關獨坐辭諍諠。按圖索意聊滌煩。羨君軒轅之後昆。浩歌一曲期勿諼。

寄贈懷渭上人

老僧懷渭字清遠。胸蟠文史三千卷。雪晴太白玉爲峰。月出藍田金作巘。少年挾策走四方。要看蓬萊水
清淺。燕山帝京龍象會。瑤臺寶林發關鍵。橫空鷗鷺撇高秋。縱轡驂騑逸長坂。龐眉老宿皆震驚。觀者解
頤陪者赧。奎章學士虞邵菴。嗜嗜稱誇枯舌本。連床笑語到晨雞。走筆贈言何款悃。轉頭霜雨四十年。萬
事茫茫不堪忖。江湖簸浪客舟寒。地爐宿火僧房煖。我來邂逅一見之。憶曾相識嗟成諼。世士如公良所
希。方外只今還有限。我如野馬貫藪澤。絡以羈韉知必腕。老來耗毫百事違。況俾三盧宅愁眼。甚欲歸依

白蓮宇。其柰素餐非力墾。寄言聊復寫中懷。白石清泉猶未晚。

金碧山水圖

武陵桃源今有無。展畫濯如夢中見。青螺作山綃作雲。白日蒼茫暖芳甸。雄梁跨壑矯脩虹。走瀑懸岷激飛電。紫鳳霄鳴梧樹枝。青雛曉啄桃花片。鳥啼長是豔陽時。草色寧隨霜雪變。衣冠尙存周典則。租稅不輸秦郡縣。山中肉芝美堪食。澗底石泉清可嘯。安得此地結茅屋。寄書漫託雙飛燕。

雪晴偶興因以成篇

玄雲四垂天黯黯。大野蒼茫飛雪糝。北風刮面利如刀。海氣昏昏迷遠覽。若華東光封密霧。比屋無烟色悽慘。天姥沈陰禹穴閉。扶胥海濤渾不撼。愁理朱鳳入杳冥。凍縮赤蛟深坎窞。猿狖哀號咽巘谷。鴻鴈驚啼亂葭菼。壯士金戈鏖鏗凌。將軍玉帳旌旗驂。師徒百萬盡熊羆。幕下從官皆燕頤。馬蹄蹴蹋坤軸震。夜半入蔡何人敢。蒼山野客拙且懶。旅舍蕭條坐無毯。頑童汲井十指直。稚子敲冰兩髦髡。今朝出日照梁棟。樓外遠山皆茵莖。初驚急溜瀉源泉。漸看縣澗掛旒旒。那無美酒洗胸臆。空有新詩吐肝膽。先人敝廬松柏在。牆角早梅應可擊。蝮蛇張鱗虎掉尾。平地倏忽成窟坳。藩閩官曹厚祿食。忍以黔黎爲醢醢。天民日望天愛憐。破瓦頽垣最悲憐。農家齊仰二麥成。且喜土膏滋九坎。清晨樹上啼布穀。柳下碧波滌澹澹。安得扁舟泛五湖。莫使中心攢百感。

題羣龍圖

世間萬類皆可觀。茫昧獨有鬼與龍。此圖畫龍二十四。狀貌詭譎各不同。得非物產有異種。或曰神變無

常蹤。一龍捷尾欲上木。足爪猶在齧法中。一龍出穴飲澗底。頭上飛瀑瀉白虹。前有一龍已在雲。顧視厥子揚雙瞳。浪波魚鱗沓。日車塊瓦天無風。中庭兩龍忽相逢。須眉葩鬱如老翁。便欲角觝爭雌雄。西望積石接崆峒。白龍擘石窺流澗。河伯遠遁虛其宮。屈蟠睡者何龍鍾。老物用亢時當終。峽外六龍躡以兇。矜牙舞爪起戰攻。齧鱗嚼甲含劍鋒。陷胸折尾波血紅。之死弗悟人誰恫。一龍引肱將欲從。迴環睨盱未敢通。最後一龍藏於垆。睥睨勝敗非愚蒙。無乃有意收全功。雲中美珠勞爾躬。不如臥沙之從容。龍子學飛力未充。母在下視心憧憧。何物一角額。準隄然出洞若蛇蟲。有龍接之自龍從。恐是鞏穴王鮪公。皮骨始蛻形猶蒙。兩龍歸來倦不狎。癡龍攀石身已癡。蝸蚪偃蹇歛騰衝。蜚螻攫躍鬢髮茸。哇呀奔擊曲如弓。百態並作何紛靡。是耶非耶孰能窮。畫師昔有僧繇工。能令真龍下虛空。安得伶倫截竹筒。吹之呼龍出石縷。使我一見開昏瞢。

爲丘彥良題牧谿和尚千鴈圖

往時惠崇畫蘆鴈。對之如在江湖游。只今此圖又精妙。中有千里瀟湘秋。乃知浮屠性多巧。意匠不與凡夫儔。吳松江長具區闊。天目虎丘青一髮。西風九月秔稻黃。朔鴈飛來翼相戛。農夫苦飢鴈獨飽。此意畫師應識察。近者分明辨羽毛。遠者縹緲瞻秋毫。或乘飄風入烟霄。或翳落日沉隍濠。起如武侯布八陣。集如萬舞回旌旄。眠沙臥草鳴且翔。喋呷藻荇亂蓬蒿。禾空穗盡卻歸去。紫塞漠漠春雲高。我家南山限蒼嶺。鴈飛不到川路永。深林大谷蛇豕盛。愁向他鄉撫虛景。人言鴻鴈比弟兄。我有兄弟隔兩城。題詩卷盡謝客去。無使感愴傷中情。

雨中寄用章上人

月盈復魄已過五。不見白日長見雨。美人娟娟隔巷陌。會面不得徒延佇。若邪當門泉湧礎。仲蔚蓬蒿塞環堵。陰風向人作秋氣。芳草日夕成宿莽。玄圭上天禹穴閉。倉水使者今何許。玉京羣仙翳煙霧。弱水西流隔玄圃。女夷鼓歌不自覺。朱鳳翅濕那能舉。自從干戈起淮甸。天下無處無豺虎。徵斂頻煩轉輸急。更有何鄉爲樂土。翳桑餓人誰復數。思家遠客空悽楚。半生身世付浮雲。獨立看雲百憂聚。晚來天南橫絳虹。雨勢未已愁雷公。井蛙谷鮒俱得意。汜濫潢潦登穹隆。方外文章誰最好。後有嬾公前笑老。裁詩忽漫寄中情。萬事茫茫聽蒼昊。

玉澗和尚西湖圖

大江之南風景殊。杭州西湖天下無。浮光吐景十里外。疊嶂湧出青芙蕖。百年王氣散荆棘。惟有歌舞留歡娛。重樓峻閣競鉛黛。媚柳嬌花使人愛。老僧不善兒女情。故作物豪見真態。想其泚筆欲畫時。高視畫工如小兒。千巖萬壑吾意匠。夸娥巨靈吾指麾。卻憶往年秋雨夕。畫舫衝烟度空碧。蒼茫不辨雲與山。但覺微風響蘆荻。須臾冷月迸深霧。時見松杉半昏黑。開尊命客彈焦桐。扣舷大啖驚海童。鮫人唱歌魚鼈應。水底影動雙高峯。只今倏忽成老翁。可憐此樂難再逢。愁來看畫欲自適。誰知感生愁轉劇。

顧周道山水圖

憶昔晉時顧虎頭。能畫聲名塞穹昊。千載而下繼者誰。君之耳孫字周道。江南山連滄海島。水遠山長愁絕倒。興來走筆如有神。濃抹淡粧無不好。前峯倚天自太古。知是天台是天姥。烟開浪波搖浦溆。草滿江

洲樹如羽。山迴兩崖夾幽谷。小橋俯暎菰蒲綠。扁舟何處覓鱸魚。滄浪水寒空濯足。柳邊碧石明素沙。茅廬似是陶公家。衡門晝掩雞犬寂。誰人共采黃金花。我屋雙溪松柏裏。清泉皎潔無泥滓。鳳皇不來鷹隼逝。白日鷓鴣嘯桑梓。華表柱頭丁令威。風塵瀕洞何當歸。感時對景重回首。不知人民今是非。

題富好禮所畜村樂圖

我昔住在南山頭。連山下帶清溪幽。山巔出泉宜種稻。繞屋盡是良田疇。家家種田恥商販。有足懶踏縣與州。西風八月淋潦盡。稻穗櫛比無蝗蝻。黃雞長大白鴨重。瓦甕琥珀香新籩。芋魁如拳栗殼赤。獻罷地主還相酬。東鄰西舍迭賓主。老幼合坐意綢繆。山花野葉插巾帽。竹筴漆碗兼瓷甌。酒酣大笑雜語話。跪拜交錯禮數稠。或起頓足舞侏儒。或坐拍手歌甌篋。傾盆倒榼混醴醬。爛熳沾漬方未休。兒童跳躍助誼譟。執遁逐走同俘囚。出門不記舍前路。顛倒扶掖迷去留。朝陽照屋且熟睡。官府亦簡少所求。寧知宴安含酖毒。耒耜一變成戈矛。高門大宅化灰燼。蓬蒿瓦礫塞道周。春燕營巢在林木。深山露宿隨猿猴。三年避亂客異縣。側身天地如浮漚。親朋阻隔董僕散。疏食水飲不自謀。有時恫怛夢閭里。驚覺五內攢百憂。君家畫圖稱絕妙。鑒別曾遇柯丹丘。想應臨榻出秘府。筆意精到世罕儔。村歌社舞自真率。何用廣樂張公侯。太平氣象忽在眼。令我感愴涕淚流。近者鄉人來報喜。今歲高下俱有秋。豺狼食飽臥窟穴。軍師已運招安籌。人情自古共懷土。況乃霜雨淒松楸。神龜且被豫且困。予所弗念天我尤。積薪厝火非遠計。誰能獻納陳嘉猷。長江波浪接淮泗。白日慘澹騰蛟虬。天下農夫總供給。隴畝不得安鋤耰。市中食物貴百倍。一豕之價過於牛。魚鹽菜菓悉賣米。官幣束閣若贅瘤。朝餐僅了愁夕膳。誰復有酒澆其喉。循環天運

往必復。邪氣慙至不遠。此生此景須再覩。引領悵望心悠悠。

題湘湖圖

君山洞庭隔江水。彭蠡無風波浪起。明窗曉晴圖畫開。興入湘湖三百里。湘江兩岸山縱橫。湘湖碧繞越王城。越王城荒陵谷在。古樹落日長煙平。游子天寒孤棹遠。七十二谿飛雪滿。浩歌不見濯纓人。沙鶴野猿相對晚。湖東雲氣通蓬萊。我欲從之歸去來。蛟鼉塞川陸有虎。兩臂無翼令心哀。

爲啓初門和尚題山水圖

天下名山隨處有。畫圖流傳亦良久。祇園道人展橫幅。觀者稱誇同一口。蒼梧九疑高插天。卷而懷之不足手。巨靈驚呼盤古怒。地軸塊坳昆侖剖。太陽出海開杳冥。蟠冢岷峨大如斗。華軒無人清晝閑。恍然置我匡廬間。金輪迥出牛女上。遠近羅列千雲鬢。江花野竹青錦斑。嵌巖斷石蛟鼉顏。岡盤谷轉絕徑路。但見湖水迴瓊環。白沙洲暖春風起。南船掛帆北船艤。吳波不盡芳草外。楚岫半入長烟裏。夜深小龍行雨歸。宮亭月落彭郎磯。旌陽步虛盧老和雜佩。散作虹蜺飛。百年塵世眞夢寐。回首旌旗塞天地。舊游何處成渺茫。一曲狂歌數行淚。青丘弱水迷方壺。武陵桃源今有無。瑤臺三島消息斷。安得羽翼啼清都。

題趙學士松圖

白塔

趙公拈筆作古松。平地躍出三青龍。蜿蜒不上霄漢去。爽颯長留烟雨濃。前朝美人鬪草處。猶有當時數株樹。江亭六月涼如秋。應與此圖相對愁。

題李陵見蘇武圖

中原無書羝不乳。狐裘蒙茸奈何許。老身漢節死生俱。地角天涯見明主。金鞍駿馬空故人。相看一笑增悲辛。悲來風沙吹上馬。河水東流日西下。空一作吾

雪鶴篇贈詹同文

有鶴有鶴丁令威。碧玉爲骨玄霜衣。層城十二身所依。千年伐毛一度歸。洗髓織女黃姑磯。瑤臺雪花大十圍。食之神爽肉不肥。乘風振羽芳菲菲。丹砂結頂燁有輝。咳唾璀璨生珠璣。朝遊明星夕大隗。騰光臨景超巍巍。膝六驂乘虹蜺。駢蓋宮仙娥。頊帝妃。銘雲鍊雨成瓊葳。眩晃晝奪扶桑輝。離眸閃爍不可睇。回森攢縱翼縞旂。白虎殼棘良厥腓。鸞鷁鳥鴻鶉鵠。鸞鷁鶴鵠。局促縮胸潛嶸崎。惟有皓鶴從之飛。竦翮夜過東皇畿。玲瓏琪樹戛金徽。砉然長鳴驚海圻。海波噴作煙霧霏。馬銜罔象蹲若韞。鯤鯨天矯相噓唏。銀河腹堅膠蜃豨。王母桃花凍不緋。五色石裂女媧譴。祝融上訴開九扉。帝命養之青鎖闈。賜以沆瀣憐其饑。朝朝暮暮朝太微。翹翎披拂天香辭。北斗粲爛星依稀。翠輶抱日露未晞。圓肱脩趾逸且頽。踰踰蹈舞霍以揮。散仙引領空相希。嗟哉清峻天下稀。勿歎遼東城郭非。桂華窅窅甘露澆。味美遠勝商山薇。擷英爲羞堪咀噉。比之琅玕亦庶幾。盤空硬語去脂韋。歌以贈君君莫譏。

贈杜安道

滄昔天兵伐荆楚。舳艫蔽江齊萬櫓。謹聲激烈似雷霆。猛氣魚休震貔虎。拔柵皖城猶俯拾。探穴九江無險阻。明年大戰康郎下。日月坱圠相吞吐。馮夷蹋浪羣水飛。巨鼉掉首三山舞。雲隨太乙擁鋒旗。豳爲豐隆作靈鼓。將軍金甲箭攢蝟。戰士鐵衣汗流雨。火龍燔燄絳天衢。燧象歷煙煎地府。鯨鯢既翦櫂槍落。草

木熙陽魚出谷。當時從臣皆俊良。近侍共推徐與杜。或操陳子之刀鐻。或負伊公之鼎俎。艱難出入矢石下。鞠躬盡力無摧阻。夙興夜寐事一人。小心不貳帝臨女。只今四海同車軌。葑菲罔遺遵往古。瓊瑁赤芾。簞鷓行。鞍馬祿食光門戶。天雞一聲金闕啓。龍顏有喜常先覩。顧我愚疎憂患集。病骨峻嶒蒸溽暑。興來懷舊倚長歌。星星兩鬢絲千縷。

誠意伯文集卷之十五

五言律詩

旱天多雨意五首呈石末公

旱天多雨意。雲日氣恆陰。草木焦枯盡。蛟龍伏匿深。
移家愁地蹙。經國恨年侵。已矣商巖叟。無人解作霖。
旱天多雨意。炎夏已清秋。虛牝空蒸鬱。高圓迥獨浮。
下田應肺蚌。深樹且鳴鳩。向夕星河影。稀疎恰近樓。
旱天多雨意。散漫起重陰。漸變峯巒狀。還攜錦繡文。
龍應愁病渴。鳥亦念將焚。碧落高無極。人間叫不聞。
旱天多雨意。炎燎發洪爐。事急徒號梗。謀窮漫曝巫。
王征愆節制。民望失來蘇。原籍看如赭。哀今鹵掠無。
旱天多雨意。雲起旋隨風。澤氣沉沙白。山嵐過野紅。
乾坤愁夢裏。日月戰塵中。漫說生生理。如何亦有窮。

次韻和石末公旱天多雨意五首

旱天多雨意。雲合又還晴。苦熱連三伏。微涼入五更。
青山黃葉遍。白水紫煙生。旦夕霞標起。依稀對赤城。
旱天多雨意。霞起衆山光。日月躔陽道。雷霆伏大荒。
躍淵無黑蜮。在牧有夷羊。萬室俱如燬。何人尙閔厓。
旱天多雨意。一望百憂侵。海沸羲和日。山藏傅說霖。
南河那可決。北斗不能斟。歎息還搔首。清商已滿林。
旱天多雨意。悽惻望鉤陳。哀籲何時達。愁眉盡日顰。
乾坤三島浪。歲月兩淮塵。莫問和調事。嗚呼賦畝人。
旱天多雨意。陰電繞空湫。暴客馮高壘。良農死藥丘。
干戈猶未息。災沴復何尤。軫望成衰疾。那堪數倚樓。

憂懷

傷離驚歲晏。引望起愁端。落日煙中小。孤雲雪外寒。浮生無限恨。垂老異鄉看。掩淚觀梅蕊。中心分外酸。

感歎

聞說蘇州破。倉皇問故人。死生俱可悼。吾道一何屯。北去應無路。南藩自此貧。淒涼轉蓬客。淚盡浙江濱。

題鑑湖送別圖

曲岸扁舟艤。澄湖祖帳開。雲生秦帝碣。雨暎越王臺。荷氣清瑤席。波光灑玉盃。情深不忍別。欲去更徘徊。

次韻和王文明雨中雜興四首

積雨累十日。平湖添半篙。風連箕畢動。雲傍斗牛高。水鶴巢林木。池魚上野蒿。農人愁餓莩。採擷到溪毛。白日迷陰陸。濃雲沒大荒。雨深筠簟潤。風度葛衣涼。虎豹歸林濕。魚龍赴壑長。波濤渺清落。悽惻解鳴璫。濕雲看欲薄。陰氣未全收。日月昏昏見。龜鼉頷頷浮。虛簷騰疥蠶。壞壁湧蜉蝣。幽獨無人問。含情謾上樓。青冥不可見。朱夏已無多。雲木光浮沒。川原氣盪磨。荒蕪一將略。浩汗五湖波。去去滄浪水。君聽鼓枻歌。

題太公釣渭圖

璇室羣酣夜。璜溪獨釣時。浮雲看富貴。流水澹鬚眉。偶應非熊兆。尊爲帝者師。軒裳如固有。千載起人思。

稽句嶺

白日隱巖壑。千崕氣勢豪。溪流婺女闊。山入少微高。危石天欹側。長風谷怒號。干戈方自此。行役敢辭勞。

淳安舟中遇雨遣悶二首

一夜青山雨。平明黃濁喧。亂流翻地軸。高響落雲根。鍛羽投林鳥。啼飢抱樹猿。羈懷正愁絕。感物重銷魂。
溪雨細如霧。北風長夏寒。汗池不赴壑。井谷自成湍。蘭茝馨香盡。魚龍世界寬。斜陽在林樹。時復捲篷看。

丙戌歲將赴京師途中送徐明德歸鎮江
疲馬懷空櫪。征衣怯路塵。那堪遠遊子。復送欲歸人。月滿西津夜。花明北固春。論文應有日。話別莫悲辛。
過南望時守闌不得行

發景州
客路三千里。舟行二月餘。壯顏隨日減。衰鬢受風踈。蔓草須句國。浮雲少吳墟。愁心如汶水。蕩漾遶青徐。

泛海詠霧
澹澹夕風作。蕭蕭蘆葉鳴。林間衆鳥息。河上一舟行。海近雲常濕。天虛月更清。神京看漸近。且緩望鄉情。

殺氣
海上苦多霧。北風吹更長。纔交積水氣。已翳太陽光。淺亂洲渚色。深迷鴻鴈行。神姦馮出入。君子慎周防。

遣興二首
殺氣乾坤黑。陰氛日月黃。已成心曲亂。不復鬢毛蒼。夜哭城笳裏。朝烟野戍傍。扶傾無郭李。何地尙畊桑。

白。日。下。西。岑。空。庭。生。夕。陰。郊。原。過。雨。色。鍾。梵。隔。墻。音。有。感。憂。思。積。無。能。老。病。深。露。從。河。漢。落。不。覺。滿。衣。襟。
月。是。今。宵。滿。花。從。昨。夜。開。看。花。嗟。寂。寞。對。月。且。徘徊。白。髮。添。無。數。青。春。去。不。回。莫。思。人。隔。世。聊。樂。酒。盈。盃。
四月十二日發揚州

幾見明月滿。猶嗟行路難。時平恥無用。身賤敢偷安。天地山河闊。風沙道路寒。旅人元有淚。不必雍門彈。

濟州太白樓

小逕迂行客。危樓舍酒星。河分洗水碧。天倚嶧山青。昭代空文藻。斯人竟斷萍。登臨無賀老。誰與共忘形。

送僧家奴參政赴河東宣慰使二首

雲中形勝地。關塞接天長。白草連沙漠。黃河入晉陽。老臣持節鉞。大闢壯金湯。昭代思賢佐。須公在廟堂。

大闢諸藩上。元戎朔漠間。天低馬邑塞。河入鴈門關。落日旌旗靜。高風堡障閑。旬宣推碩望。喜色動龍顏。

送人赴德清稅

鏡湖木葉落。震澤水波生。鳧鴈衝人起。笙歌送客行。鹽津魚罟集。桑屋繭絲明。王稅隨時足。吟哦待太平。

題釣雪圖

雪暗洲渚白。江清蒲柳寒。悠揚雙短棹。汗漫一魚竿。忽憶滄浪曲。因悲行路難。蛟鼉正驕恣。還爲爾長歎。

將曉

愁夢不更續。寒天將欲明。雪風吹海樹。霜月凜江城。衰病丹心在。艱虞素髮盈。殷勤東注水。渺渺若爲情。

不寐

不寐月當戶。起行風滿天。山河青靄裏。刁斗白雲邊。避世慙商綺。匡時愧魯連。徘徊懷往事。惻愴感衰年。

秋感

老病偏多感。宵長晝亦長。衣冠方謝暑。枕席已驚涼。往事鑄心在。新知過眼忘。籬邊舊栽菊。歲晚爲誰黃。

秋興

天淨山月出。水寒沙鳥鳴。孤燈秋後思。短笛夜深情。江海空衰鬢。乾坤未弭兵。清都隔河漢。訶禁有開明。

晚思

返照吳山外。歸雲越水頭。寧捐白羽扇。卻着黑貂裘。草暖鳧鷖渚。波香杜若洲。艱難愧生事。汗漫想扁舟。

望孤山作

曉日千山赤。寒烟一鳥青。羈心霜下草。生態水中萍。黃屋迷襄野。蒼梧隔洞庭。空將垂老淚。灑恨到滄溟。

青絲馬

蹀躞青絲馬。艱難赤伏符。窮陰歲欲暮。落日鬼相呼。見鴈愁心裂。看天淚眼枯。殷勤夜深月。還照旅魂孤。

十二月一日

耿耿夜不寐。源源憂思來。歲餘三十日。腸定九千回。江響風初發。天昏月未開。白頭真合得。非是楚猿哀。

古戍

古戍連山火。新城殷地笳。九州猶虎豹。四海未桑麻。天迴雲垂草。江空雪覆沙。野梅燒不盡。時見兩三花。

客路

客路秋風裏。扁舟夕照時。渚鴻魚復陣。江樹井陘旗。衰朽嗟誰與。愚蒙荷帝慈。山中牧羊子。歲莫爾相期。

逢熊文彥二首

相離已隔世。相會豈忘情。識面非觀貌。知心只記名。夕陽荒野闊。秋水大江平。往事無勞問。空令萬感生。

憶昔相逢處。湖山錦繡春。筦絃喧夾巷。花柳隘通津。離別人非故。推移物自新。愁來重回首。涕淚下霑巾。

五言長律

錢唐懷古得吳字

澤國繁華地。前朝舊此都。青山彌百粵。白水入三吳。艮嶽銷王氣。坤靈肇帝圖。兩宮千里恨。九子一身孤。設險馮天塹。偷安負海隅。雲霞行殿起。荆棘寢園蕪。幣帛敦和議。弓刀抑武夫。但聞當宁奏。不見立庭呼。鬼蜮昭華袞。忠良賜屬鏤。何勞問社稷。且自作歡娛。秔稻來吳會。魚鼈出具區。至尊巍北闕。多士樂西湖。鷁首馳文舫。龍鱗舞繡襦。暖波搖髮積。涼月浸氈餈。紫桂秋風老。紅蓮曉露濡。巨螯擎擁劍。香飯渡雕胡。蝸角乾坤大。鼈頭氣勢殊。秦庭迷指鹿。周室嘆瞻烏。玉馬違京輦。銅駝擲路衢。含容天地廣。養育羽毛俱。橘柚馳包貢。塗泥賦上腴。斷犀埋越棘。照乘走隋珠。吊古江山在。懷今歲月逾。鯨鯢空渤海。歌詠已唐虞。鷗革愁何極。羊裘釣不迂。征鴻暮南去。回首憶葦鱸。

誠意伯文集卷之十六

七言律詩

寄題昇元觀綠筠軒

帶郭軒楹曠綠筠。八牕瀟灑總宜人。風生密葉蛟龍舞。露下寒梢翡翠勻。不待剪裁調律呂。若爲惆悵憶伶倫。五城雙闕煙塵隔。且傍林巒寄此身。

送李子庚之金陵

舍下微波湧碧鱗。湖邊草色可憐人。也知使者徵書急。莫厭輕舟出郭頻。春酒盈缸清似水。時魚帶子白於銀。山桃野杏能紅紫。醉眼相看意自真。

欣懷亭二首爲脫因宗道賦

欣懷亭子湖山上。山色湖光八面開。恰似崑崙積石圃。湧出王母閩風臺。驪龍夜靜擎珠上。神女天寒委佩來。何日扁舟一繫纜。高躋絕頂望蓬萊。

愛子山亭湖水中。雜花脩竹合蒙籠。三春錦繡花迎日。十里笙簫竹度風。菰飯炊來勝雪白。鯉魚釣得出波紅。浮生無事當爲樂。應許閑人一醉同。

送趙元舉之奉化州學王

東風吹雪作春波。送客中流發棹歌。酒至莫辭狼籍醉。情深無柰別離何。天童山杏嵐光暝。佛手江長海氣多。泮水紫芹香可攬。倚看待佩樂菁莪。

次韻退和音上人

絕頂浮雲鎖石關。曲途危磴阻躋攀。他年甲楯孤臣泣。此日齋鍾老衲閑。夜永星河低半樹。天清猿鶴響空山。干戈未定歸無處。擬結茅廬積翠間。

題王起宗御史江山煙靄圖

繡衣御史乘驄暇。貌得江山煙靄圖。日落風雲連紫極。天寒波浪隔蒼梧。魚龍縱壑深無底。猿鳥歸巢暝不呼。羈旅傷心緣百感。可堪回首憶吾廬。

二月二日登樓作

薄寒踈雨集春愁。愁極難禁獨上樓。何處山中堪採藥。幾時湖上好乘舟。銜泥客燕聊相傍。泛水浮萍可自由。見說蘭亭依舊在。於今王謝少風流。

感興

赤城霞氣接天台。上界仙宮此地開。滄海有波容蜃鱗。石梁無路入莓苔。當時玉帳耽羅綺。今日絲綸到草萊。傳語疲氓聊忍待。王師早晚日邊來。

發嵯縣至上虞道中作

磴滑泥深去馬遲。雪殘青嶂不多時。荒煙蔓草中郎宅。素石清谿烈婦祠。日落風生臨水樹。野寒雲濕渡

江旗宣光事業存書史北望淒涼有所思

次韻和謙上人秋興一首

山雲滿地起秋濤。涼葉驚風下九臯。藥籠空聞收馬勃。弦歌豈復用牛刀。草間狐兔營三窟。天上龍鵬昧六韜。周漢中興還有日。載歌亦伏詠嵩高。

聞高郵納款漫成口號

聞道高郵已撤圍。卻愁淮甸未全歸。聖朝雅重懷柔策。諸將當知虜掠非。堯帝封疆元蕩蕩。世皇功業甚巍巍。忠臣義士同休戚。縱欲偷安總禍機。

春興

近聞丹詔出天闈。聖主鳴謙下土知。豈意豺狼猶桀黠。未隨千羽格庭墀。四郊多壘忠臣恥。百戰無前壯士規。寄語總戎熊虎將。莫教長魏伐檀詩。

再用韻答嚴衍二上人

負郭無田生事疎。微官已謝不須除。散愁漫入高僧舍。乘興還過野老居。草冷蟲聲悲杼軸。霜餘蕉葉碎緘書。黃花素髮相將暮。獨立淒涼憶往初。

又用韻答嚴上人

中夜登樓望紫微。北辰不動衆星依。由來赤日行黃道。多事玄雲變白衣。雪下蓬萊三島隔。濤翻滄海萬魚飛。聖君宵旰惟恭己。早晚陽和斡化機。

次韻和孟伯真感興詩

避難移家適遠鄉。憂時一夜百回腸。徒聞鐵甲連戎壘。未覩鉤車跨賊隍。不共班超爭食肉。欲尋木羽學休糧。磨崖可勒中興頌。努力諸公佐有唐。

妙成觀用何逸林通判韻

我訪仙家溽暑前。青楓綠柳暗晴川。竹根露濕登山屐。沙際鷗迎渡水船。雲氣長留虛白室。丹光直上蔚藍天。純陽道士重來日。爲問蓬萊是那邊。

得胡仲淵書歡喜成詩奉呈石末公兼簡三益軍諮

故人忽寄一封書。愁眼還明病亦無。風滿高林歸猛虎。月涼古塚散妖狐。大廷職貢當遄復。戎馬資糧不再輸。更喜元侯契天意。良苗得雨應時蘇。

次韻和石末公秋日感懷見寄二首

郊原如赭已無秋。況復干戈未肯休。肉食不知田野事。布衣深爲廟廊憂。典章淪落悲芻狗。餽餉倭遲想木牛。禮樂將軍今卻穀。豺狼滿地待處劉。

秋陰竟日似黃昏。夏旱良苗不半存。敢望魚雞充醢醢。尙期菘韭作饔飧。煙塵慘澹黃公石。雲氣蒼茫紫極垣。作檝濟川須傳說。九關虎豹向誰論。

重陽日使者持詔用韻東石末公

中元悲斷義和報。九日歡迎詔使來。紫禁羽林分壘壁。清秋辰極照中臺。願從黃石明三略。莫使詩人賦

七哀蟻垤牛涔休沸蕩泰山喬嶽甚崔嵬

夜坐有懷呈石末公

西風白露下清寥。岸柳江蒲取次凋。諸將旌麾非一統。大藩衣服變三苗。雄豪竊據皆屠狗。功業輿臺總續貂。乘馬獨知懷故轡。天涯涕淚北辰遙。

次韻蒼石末公傷用三苗之作

周用羌髡功有赫。唐通回鶻禍無訾。豳歌鄭曲非同調。楚服秦驂實背馳。安得着鞭先祖逸。趨陪前蹕學姚期。扶持聖主中興業。整頓乾坤去詭隨。

石末公家人自台州來以詩問之

委羽山前海水飛。赤城霞色亂斜暉。過庭且喜諸郎至。懷土休嗟舊業違。李晟孤軍終獨捷。杜曾百戰竟安歸。丈夫事主心如石。去殺勝殘自有機。

次韻歲菊

風霜搖落愈傷神。黃菊於予意自親。遲莫長存君子操。淒涼不厭主人貧。天虛沆瀣流清氣。月過青冥動細淪。此夜空庭耿相對。春花夏葉總埃塵。

次韻和石末公歲除送窮之作

五夜雪霜清沴氣。三陽玉燭照芳春。願聞馴象來林邑。復覩封牛至屬賓。川后山祇爭效職。淮夷海獠悉歸臣。君王垂拱明光殿。聖敬如湯日日新。

次韻和石末公春晴詩

幽禽嘖嘖語朝陽。細綠駸駸入女乘。天上深宮調玉燭。人間和氣應勾芒。赤眉青犢終何在。白馬黃巾莫漫狂。將帥如林須發蹤。太平功業望蕭張。

次韻石末公題桃源卷

桃花逐水縈紆入。不覺清溪路淺深。執手問名驚見面。論新話舊各傷心。壺漿餽餉殮加璧。館穀溫存贈有金。似此情懷良匪惡。何嗟歲月去駸尋。

再次韻時閏九月九日菊

秋來有菊卽重陽。曷問他鄉與故鄉。愁見飛蓬垂雪領。笑褰落蕊入霞觴。陶時莫訝逢餘閏。遣興聊圖不末傷。歲晚移根深記取。勿令紅紫間中黃。

再用前韻頌菊

天遣幽花駐獨陽。移根應自白雲鄉。釀成甘谷千年液。滿泛瑤臺百寶觴。人老容顏猶可返。歲寒霜雪復何傷。得時無用空妖冶。愧死姚家宮樣黃。

次韻和石末公聞有詔使不至

祈招旦夕動遐心。疾首西歸望好音。鳳下丹霄雲杳杳。魚飛碧海霧沉沉。徒言雨露無私潤。誰謂陽和未薄臨。何日六師能電掃。周原依舊載馳駸。

總謂浮雲解作霖。豈期雲氣漫成陰。何人奠璧頻瞻仰。有客悲歌歎毒淫。瑣帝權移天曷定。神龍用亢海徒深。掩身未服先賢訓。向日空懷寸草心。

望江亭

柳拂江亭舊畫欄。望潮人去地應閑。寢園寂寞秋風裏。行殿荒涼野草間。白塔盡銷龍虎氣。荒城空鎖鳳凰山。興亡莫問前朝事。江水東流去不還。

發紹興至蕭山

落日牛羊下綠坡。微風短檝拂晴莎。窮愁白髮真相得。悲感青春最苦多。水暖菰蒲沙鷁集。月明洲渚傍人歌。此時忽漫思身世。柰爾桃花滿眼何。

宿蠟燭菴俊上人房

城外春江動客愁。江邊細草綠悠悠。還將短髮臨岐路。畏向東風憶舊游。斜日遠天歸鴈急。薄寒孤館落花稠。青燈不放還鄉夢。一夜腸回一萬周。

二月七日夜泊許村遇雨

漫喜晴天出北門。還愁急雨送黃昏。山風度水喧林麓。野樹翻雲動石根。宿麥已隨江草爛。新泉休共井泥渾。魚龍浩漫滄溟闊。澤畔誰招楚客魂。

嘉興寄王昌言學正

去年相別鴈來初。今日相思柳拂渠。對酒放歌難再得。登高作賦近何如。黃華燁燁輕煙裏。碧草油油小

雨餘欲棹扁舟尋逸少。爲愁妨寫換鵝書。

感懷二首

新晴楊柳散春絲。長路行人有所思。愁上容顏青鏡識。寒生亭館落花知。高雲送雨來無定。獨鳥驚風去自遲。悶對亭前紫荊樹。同根那得卻相離。

不到西州又十年。青山白水獨依然。徒聞雞狗供輸盡。無那干戈迤邐延。天上九霄空玉燭。人間萬井共貪泉。草中攫取雲中送。坐待連茹紫闥邊。

寄臺郎張質夫

春愁忽得故人書。喜極成悲淚滿裾。冀野鶩駘虛伯樂。魯門鐘鼓駭爰居。全家蕩析飢寒切。病骨支離志慮疎。敢以浮名誤知己。緘辭寫意愧何如。

水西寺東樓曉起聞鶯

日上高城柳影齊。風軒臨水看鶯啼。初來木杪鳴相應。稍入花間聽卻迷。芳草自深句踐國。行人猶隔禦兒溪。思家每恨無輕翼。可對鸞華不惛悽。

茶園別朱伯言郭公葵

細水吹煙送客舟。離情恰似水東流。此時對酒難爲樂。何處尋春可縱游。去雨來雲天渺渺。輕蜂亂蝶日悠悠。絕憐短髮無聊賴。一夜如絲白滿頭。

二月二十三日自黃岡還杭途中作

日照江邊看棧材。繁花亂葉感人心。花間蚊蠅洩多事。葉底杜鰲非好音。舉目山川成皓首。側身天地一沾襟。解憂惟有尊中酒。疾病年來已厭斟。

晚泊海寧州舟中作

春霧今宵氣稍清。空江一舸客心驚。東流濁浪衝山動。西望長庚似月明。不有饗黃爲郡縣。徒令耒耜化戈兵。溥天何處非王土。無地安身愧此生。

憂懷

羣盜縱橫半九州。干戈滿目幾時休。官曹各有營身計。將帥何曾爲國謀。猛虎封狼安荐食。農夫田父困誅求。抑強扶弱須天討。可恠無人借箸籌。

春興七首

柳暖花融草滿汀。日酣煙淡麥青青。枝間好鳥鳴求友。水底寒魚陟負萍。異縣光陰空荏苒。故鄉蛇豕向羶腥。感時對景情何極。悼往悲來總涕零。忽聽屋角鬧晨鳩。起看園林綠漸稠。小雨霏霏涵日過。新泉細細入河流。殘花斷柳虛歸計。遠水他山聚客愁。鴻鴈南飛限蒼嶺。傷心何處問松楸。於越山城控海壖。春風回首忽經年。憂時望月青霄迥。懷土登樓白髮鮮。江上波濤來渺渺。雲中鴻鵠去翩翩。暮寒細雨餘花落。夢達天涯到日邊。會稽南鎮夏王封。蔽日騰空紫翠重。陰洞煙霞輝草木。古祠風雨出蛟龍。玄夷此日歸何處。玉簡他年豈

再逢安得普天休戰伐。不令竹箭困輸供。
臥龍山奠越王都。羣水南來入鏡湖。苦恠桑田非舊跡。還驚雉堞是新圖。白波翠靄浮天際。綠樹青莎到海隅。便欲投身歸釣艇。不知何處有尊鱸。
深春積雨感年芳。暮館輕寒透客裳。翠柳條柔先改色。紫蘭花冷不飄香。山中虎豹人煙少。海上樓臺蜃氣長。燕子新來畏沾濕。一雙相對立空梁。
憶昔江南未起兵。吳山越水共知名。蘋萍日暖遊魚出。桃李風和乳燕鳴。紫陌塵埃嘶步景。畫船歌管列傾城。于今征戍誅求盡。翻對鶯花百感生。

雨中遣懷

青春苦寒雨太多。野水極目似秋波。湖上芳草生已遍。山中美人愁奈何。思家無計鏟荆棘。避地只恐觸蛟鼉。落花零亂晚風起。坐看城頭烏尾訛。

送岳季堅入計籌山

陽羨先生故將孫。拂衣高蹈入玄門。甕盈五粒松花酒。食有千年枸杞根。自得詩篇留客誦。頻來猿鳥識人言。浮雲富貴非吾愿。此意陶公可與論。

爲賈性之題山水圖

不見唐朝王右丞。世間畫史少知名。何人貌得煙雨意。靜聽如聞風水聲。遠岫帶雲纔隱約。斜陽照樹卻分明。清泉素石堪乘興。欲買扁舟過此生。

題雪竹圖

雪壓江邊脩竹林。沅湘晚色起愁陰。川光蕩漾空清闊。山氣玲瓏太白深。未得梢雲邀鳳宿。可能映水學龍吟。無人谷裏吹春律。直節虛中恐不禁。

題脩竹圖

九疑山下湘江畔。多少篔簹覆碧湍。自有清陰堪解愠。也能結實待棲鸞。滾滾暖翠晨煙合。顆顆明珠夕露溥。長日焚香對圖畫。青冥風雨共淒寒。

題畫蒲萄卷子

西域蒲萄也自奇。畫圖驚見墨淋漓。迎風翠羽慄慄動。帶露玄珠纂纂垂。此日散愁思釀酒。幾回病渴想如飴。春牕隱几成幽夢。應共張騫到邛支。

蕭山山行

積雨今朝天氣佳。山亭曉色上林花。未須汗漫思身世。且可逍遙翫物華。偶值斷橋妨去路。卻隨脩竹到隣家。籬邊野鴨驚人過。撥刺飛鳴落遠沙。

蕭山任氏山堂

新堂結構倚巖阿。地僻無譁樂事多。日上黃鸝鳴翠竹。雨餘紅鯉躍清波。消除暑氣憑松栢。舒卷煙嵐任薜蘿。珍重主人能愛客。衰顏聊復爲君酡。

以紈扇贈奎上人並寄以詩

新裁紈扇如圓月。寄與靈峯奎上人。不共青蒲爭巧拙。好將白氎伴清新。薰心炎暑誰能敵。應手涼風自有神。莫怨秋來藏篋笥。明年朱夏更相親。

靈峯寺棲雲樓

靈峯之中樓倚山。山雲日夕棲其間。九霄雨露隨高下。六月風雷送往還。青嶂曉光浮藻稅。銀河夜氣濕松關。天臺向上無多路。鷺嶺煙霞此可攀。

題瑞上人山水圖

上人性僻耽山水。應是王維第二身。蘭渚流觴新到越。藍田別業舊通秦。驅馳翰墨迴龍虎。簸弄風雷感鬼神。羈旅相逢聊自慰。莫思天地有煙塵。

普濟寺遣懷

江上西風一葉黃。莎雞絡緯滿叢篁。物華乘興看都好。時序逢愁速不妨。露下星河光潑灑。月明巖谷氣清涼。願聞四海銷兵甲。早種梧桐待鳳凰。

崇福寺儔上人看山樓

爲愛山中世事疎。看山終日坐茅廬。林花澗草香無際。翠壁丹崖錦不如。禹穴風雷翻石鶴。耶溪波浪動金魚。此時應寤幽棲樂。底用凌雲獻子虛。

宗上人溪山亭

湖上清溪溪上山。山亭結構俯人寰。窗中樹色宜晴雨。門外灘聲自往還。鍊藥井寒玄鶴逝。采蓮舟去碧

波閑春蘭秋桂年年好。憔悴風塵漫厚顏。

題水墨蓼花草蟲

爲愛江頭紅蓼花。秋來獨作草蟲家。尋香粉蝶應隨夢。采蜜黃蜂不趁衙。絡緯語殘涼露滴。蜻蜓立困晚風斜。畫圖水墨驚初見。卻似扁舟過赤沙。

題山水圖爲寶林衍上人作

雨過秋山日欲曛。白雲如雪擁山根。高松浥露和煙冷。迸水穿沙出谷渾。擬向蘿陰緣石徑。卻尋花片入桃源。畫圖應有通神處。他日相從子細論。

次韻和新羅嚴上人秋日見寄二首

露冷風清木葉疎。蓼花莎草沒階除。子雲詞賦空投閣。仲蔚蓬蒿漫索居。羣盜只今齊得意。故鄉從此遂無書。鏡中短髮非松栢。歲晚看看不似初。愛汝精藍抱翠微。青松綠竹共依依。龜臺落日明霞綺。鰻井寒潮長石衣。銀杏子成邊鴈到。木犀花發野鷺飛。鍾殘永夜禪心定。一任秋蟲促杼機。

重用韻答嚴上人

坐見風霜百草疎。卻憐光景漸消除。萍蓬飄蕩三年客。松菊荒涼五畝居。陋巷蒼苔封蟻垤。空庭黃葉帶蟲書。江楓恰似知人意。強學芳菲二月初。

江水東流西日微。閑身不繫獨何依。塵埃爽颯枯蓬鬢。霜露淒涼破衲衣。百粵雨餘山翠合。三韓雲淨海

青飛滄溟自古通天漢。夢繞黃姑織女機。

再用韻答嚴衍二上人

厚祿故人音問踈。天官不擬介推除。莫思浮世塵埃事。好共深山木石居。月滿高樓留客話。燈明寒榻課兒書。城頭鼓角沉沉夜。腸斷鄉關入夢初。蔓草萋迷野色微。嗷嗷鳴鴈欲誰依。殘花露淡胭脂靨。落木霜凋薜荔衣。萬國舊聞車軌一。九州今見劫塵飛。總戎安得英雄將。不放龍蛇起殺機。

復用韻答嚴上人

閉門無事往來踈。窗外從他草不除。食肉已忘三月味。謀身欲去九夷居。人情自古懷鄉土。天下何時罷羽書。莫向西風苦惆悵。白雲流水只如初。西風吹樹夕陽微。斥鴳鷦鷯各有依。幕府三年雙短鬢。鄉關千里一沾衣。江淮渺渺人煙少。梁楚茫茫鬼燐飛。誅暴保民黃石略。將軍莫自失戎機。

仍用韻酬衍上人

多愁祗覺世情踈。愁極憑誰與破除。江海煙塵羈客淚。雲山桑梓別人居。高風斷鴈惟將恨。衰草殘螢不照書。世亂弓刀方有用。休誇新句逼黃初。歲莫天寒生意微。空林鳥雀自相依。有情霜葉欺花貌。無用風荷象客衣。西塞鼓鞞山岳震。東郊羽檄海波飛。傳聞有詔頒南服。早晚陽和幹化機。

樹頭寒月影扶疎。天上清霜下玉除。紫塞風高鴻失路。碧梧枝冷鵲移居。虎頭曠日糜倉粟。牛腹中霄詫帛書。見說抱關堪避世。稗官猶可學虞初。

西風吹面雨霏微。片片浮雲水上依。鴻鴈羣翔營口實。鳧鷖對立惜毛衣。關河慘烈時將晚。原野蕭條葉自飛。慚愧江湖一萍梗。厭聽咿軋響隣機。

題寒林圖

搖落江邊秋樹林。淒涼久客二毛侵。藤蘿歲晚龍蛇死。叢薄天寒虎豹深。流水斜陽人遠近。青煙白草鴈飛沉。桂花自在山中發。悵望西風起夕陰。

題訪隱圖

忽憶山中陶隱居。杖藜衝曉謁茅廬。林花浥露紅無比。澗草含煙綠有餘。金鼎丹光纏日月。銀河流水到塔除。松間白鶴通人語。長向瑤臺寄遠書。

宿賈性之市隱

今年冬雨不作雪。屋頭鳥聲渾似春。絕憐草色綠鋪地。可愛梅花白照人。時物已迎新歲換。交情空向異鄉親。忽思昨夜殘燈裏。錯認還家夢是真。

題陸放翁湖上詩後

放浪江湖一老翁。若耶溪上幾春風。門前流水斜還直。籬外閑花白復紅。甚欲賦詩追杜子。也能縱酒學

陶公細看墨蹟成懷古。歎息他鄉類斷蓬。

次韻和孟伯真感興四首

五載江淮百戰場。乾坤舉目總堪傷。已聞盜賊多於蟻。無奈官軍暴似狼。綠水青山人寂寂。長煙蔓草日荒荒。弟兄零落音書絕。腸斷春風一鴈行。

無用文章豈療飢。勞生筋骨已支離。窮愁杜甫家何在。落魄陳平計未奇。草澤狐狸三窟固。江湖波浪一帆危。故園春色年年到。綠葉紅花好爲誰。

平時盜賊起成雲。厚祿能忘愧庶民。樽俎自高廊廟策。經綸不用草茅人。思家遠道風塵惡。爭食空山虎豹嗔。莫怪洛陽年少客。持書痛哭向楓宸。

多事繁花白暎紅。無愁細草綠浮空。春秋迭代人先老。天地生成意不窮。鳳鳥長辭西嶺樹。鯨魚自起北溟風。幾時學得玄真子。箬笠蓑衣一短篷。

次韻張德平見寄

漠漠長煙野色昏。霏霏細雨濕衡門。乾坤象緯尋常轉。江海波濤日夜翻。賈誼奏書哀自哭。屈原心事苦誰論。近逢使者徵遺逸。說道巖廊納讜言。

題承天觀

吳山頂上承天觀。玉牒金符鎮地靈。百尺樓臺依斗極。九霄風露出牕櫺。江聲洶湧蛟龍闕。雲氣虛無翡翠屏。見說蓬萊恰相對。仙凡只在隔滄溟。

感興三首

病骨愁寒憶見春。及觀春色卻愁人。轉添細草當門徑。不惜穠華委路塵。去國杜鵑紅淚盡。傷時庾信白頭新。風波滿地鷓鴣鳥。相趁噉魚飽一身。

二月江南雪片飛。吳山寒色動征衣。莫尋花徑防泥滑。且掩衡門待日晞。弱柳先舒應自損。蟄蟲已出更安歸。乾坤處處旌旗滿。肉食何人問采薇。

春院微風栢葉垂。朝寒坐看雀爭枝。娟娟墜雨拋蒼蘚。點點輕花赴綠池。景物關情悲自老。江山滿目惜時危。長生應有真仙訣。漫把黃金駐黑髭。

可歎

風雨瀟瀟聽曉雞。忽思世事一悲悽。當時重禁藏矛戟。今日呼令學鼓鞀。未見爭鋒曾奏捷。徒聞卻走不先迷。劫灰日夜飛相逐。隨處空林有燕棲。

柯橋靈秘寺卽景贈基上人

盡日陰陰風墜花。樓前溝水發芹芽。青春院宇僧房好。白晝豺狼客路賒。對坐蝦鬚迴舞燕。出門鷗尾立飢鴉。相期握手何時再。五月芙蓉隘若耶。

次韻和石末元帥見贈二首

雨過前溪曉色新。山城草木靜埃塵。殊方負固猶蝸角。此地偷安賴虎臣。高閣綠蘿相對晚。畫闌紅藥不勝春。誰憐衰病兼踈拙。漂泊東西一旅人。

元戎玉帳擁旌麾。武略文韜並出寄。構廈可堪無大匠。安邦曾見活危棊。此時山斗歸民望。他日龍鵬簡帝思。我輩迂狂乖世務。趨風執御更何疑。

雨中寄季山甫二首

山雨隨風去復來。南明晚色動樓臺。猶憐仗節中郎在。不見乘槎使者迴。感興詩成聊自遣。忘憂花好爲誰開。偏嫌近水多螻蠅。永夜喧呼聒夢回。長夜雨多泥沒車。白日閉門人跡踈。階下水衣看上壁。庭前簷溜欲成渠。閑花自發無勞種。蔓草從生不遣鋤。想見幽棲張仲蔚。蓬蒿如樹塞園廬。

五月二十九日喜雨奉賀石末元帥

使君設醮天皇格。道士陳章玉女闈。遂遣赤松來作雨。更教玄武下乘雷。涼飈細拂花間入。潤色新從草際回。豈但農夫堪一飽。野人亦有酒盈盃。

用前喜雨韻寄呈石末元帥時戊卒有不軌謀蓄而未發公治之以意卒遂返正故發之以言且并志祈雨有應也

將軍渡水流澌合。太守彎弧巨石開。但覺誠心通日月。不知生意在風雷。思尊未許歸張翰。結草終當獲杜回。可恠疎狂謫仙子。兼旬浪飲六千杯。

題紫虛觀用周伯溫韻

少微山直太微宮。山下樓臺起半空。丹井石床纏地絡。瓊牕翠戶出天風。傳聞仙子常時到。應是神霄有

路通會待九秋明月夜高吹鋏笛上青葱

題紫虛道士晚翠樓

晚翠樓子好溪南。溪山四圍開蔚藍。微陰草色盡平地。落日木杪生浮嵐。巖畔竹柏密先暝。池中芰荷香欲酣。聞說仙人徐泰定。騎鸞到此每停驂。

葉叔安南溪草堂卽事

溪上草堂盈十尋。踈楊密竹各成陰。綠煙纔舍乘畦靜。白水當門稻遂深。過雨忽翻金碧影。涼颿亂發管絃音。此時不省愁何在。坐到鴉棲月滿林。

妙成觀北亭用何逸林韻

最愛雲山滿目前。更憐亭榭俯清川。草深林藹迷樵徑。花落巖霏點客船。碧澗金芝新出地。丹崖石穴舊通天。神仙應在樓頭上。翠羽霓旌下日邊。

以梨餉石末公侑之以詩

山人見餉含消實。青紫相排箇箇圓。共道解煩同絳雪。也知止渴勝甘泉。種從漢武樊川得。名並張公大谷傳。珍重使君方閱雨。急須走送滌熬煎。

遣悶柬石末公

綠楊落盡白楊枯。坐石徒令歲月徂。尙想藩臣知患盜。豈期驛使似投巫。當時秔稻通遼海。今日風濤隔具區。豺獮可堪專節鉞。衣冠何以拔泥塗。

次韻和石末公中秋不見月詩

一年明月中秋好。萬里長空此夜陰。雨暈青燈昏遠思。蟲鳴黃葉亂鄉心。見愁盜賊氛猶惡。莫恠乾坤氣尚淫。便欲捫蘿上天柱。九霄風露恐難禁。

次韻和石末公七夕詩

天上傳聞會兩星。清秋夜色湛玄冥。蚌胎隱見銀蟾窟。鵲翼高低玉女驂。一水經年纔邂逅。七襄終日豈神靈。勞生厭事惟思睡。獨臥無心覲帝青。

再和倒用前韻

天官垂象煥空青。會合徒聞帝子靈。三武夜開千石簾。兩旗晨轡七香輦。房帷瓜果紛祠祀。霄漢雲霓隔晦冥。惆悵多憂江海客。登樓獨自看臺星。

病足戲呈石末公

晏天容我作支離。病瘡纔除足就羸。跬步不妨猶似鼈。踔行那得更憐癡。抱珍獻楚何堪再。斫樹收龐亦未遲。塞叟于今知匪禍。周雞從此免爲犧。

遣悶呈石末公

公庭春樹秋重綠。但見鳴鳩日日鳴。不雨正當三伏熱。看雲無奈百憂生。草間羣盜俱糜爵。天下何人尚力耕。漢法幾時還再復。白頭猶得詠昇平。

庭前萱草花落已久至秋復開感而作詩柬石末公

露下蛩鳴寒氣催。兼葭葉響鴈歸來。鬢毛已爲憂生白。護草何須晚更開。嫋嫋悲風吹落木。炎炎赤日走黃埃。干戈未了仍飢饉。人事天時總可哀。

次韻和石末公閔雨詩

騰雲降雨指龍功。況復山川祭秩隆。豈意愆陽爲沴氣。忽過炎夏到秋風。祈年勞酒儀徒備。登穀嘗新望已空。享祀未應無報稱。可堪不殺待時豐。

再用韻

旱魃爲妖殄歲功。田疇龜坼徧汗隆。無多過雨纔鳴葉。不定行雲又逐風。蔓草荒煙秋社迥。黃沙白葦暮江空。愁來漫憶淳于祝。卻愧靈祇享祀豐。

妙成觀道士劉雲心挽詩

少微星下葬神仙。白玉樓中迓翠輶。弟子焚香玄鶴逝。天官肅駕紫鸞翩。金丹縹緲空山月。鉄笛淒涼遠樹煙。溪上故人如見問。碧桃花裏過年年。

次韻和石末公閔海上使命之作因念西州愴然有感二首

巫閭析木天空闊。桐柏終南水亂流。邑里蕭條無吠狗。田疇蕪穢少耕牛。萋萋蔓草隨人遠。淡淡殘陽向客留。遲莫飄零偏感舊。幾迴垂淚睇神州。弟子輿尸漫有師。圯橋誰共老人期。龍魚並出應難識。樗櫟無庸幸見遺。每上樓臺瞻北極。願聞波浪帖南陲。吳山越水元相接。莫更中流下鐵椎。

驛傳杭台消息石末公有詩見寄次韻奉和并寓悲感二首

被讒去國終思楚。厚貌深情漫劇秦。未識龐萌真老賊。妄期侯景作忠臣。池魚幕燕依棲淺。軒鶴冠猴寵渥新。何處荃蘭不蕭艾。種蔬猶得養閑身。爽亂如川未有涯。悲風滿地是蟲沙。衰遲兩臂從生柳。疾病雙眸但隕花。暗菴寒蟬秋色老。丹楓紫菊夕陽斜。頗聞四國思郇伯。尙想詩人賦木瓜。

再次韻二首

南州昔日稱三楚。西國今聞又一秦。有爵與糜亡命賊。無才深媿具官臣。青冥鸞鳳風塵隔。畫省貔貅服色新。悵望令人憶李郭。誰能匡濟想捐身。深秋蔓草接天涯。極目飛鴻沒遠沙。綠水青山長送目。汀蘭岸蓼各生花。風來西塞雲陰合。濤落東溟蜃氣斜。歎息笙歌舊亭館。壞垣叢棘老王瓜。

次韻和石末公感興見寄

使君學術似文翁。奕世流芳緝武功。亦帶青衿來燕喜。黃童白叟望車攻。筆端波浪翻三峽。旗尾龍蛇動八風。慚愧譚才多謬誤。憂時獨有此心同。

次韻和石末公無題之作

秋風嫋嫋作商音。落葉枯荂日夜深。已爲抵烏投白璧。徒勞點鐵冀黃金。軒轅未必迷襄野。夸父終當死鄧林。笑撚東籬菊蕊。天寒歲晚爾知心。

次韻和石末公九日見寄

去年見鴈思鄉里。今歲還鄉鴈不來。此地淒涼逢九日。何時清切觀三台。莞茅夜冷蛩蟄急。禾黍秋空鳥雀哀。辟難無勞效桓景。巢居隨處壓崔嵬。

陳太初充兵應點作詩戲之

無僕無臺一老儒。數間茅屋近通衢。忽聞巷長呼排甲。急換戎裝出荷戈。就列敢辭長拱立。隨羣獨作沒塔趨。西風鼓角秋宵永。明日青髯是白鬚。

次韻和石末公開讀有感

百年萬國奉王正。相業臺綱屬老成。山海若時共職貢。郊原何處有戈兵。廟謨可使歸權倖。祖訓由來重變更。欲叫天關無羽翼。拊心長嘆不勝情。

秋夕有感柬石末公

獨立西風聞莫蟬。起看時物愴流年。星臨野樹輝輝動。露出庭莎的的圓。無奈素絲侵綠鬢。卻嫌黃菊似金錢。煙塵滿眼難回首。惆悵高堂坐細甌。

次韻和石末公自訟之作

綠駢驂駟不服驂。王良造父亦難堪。羨君名重中台上。勳業終光北斗南。露井淒風殘綠少。霜林落日亂紅酣。侯封職在同藩屏。班爵無勞阿伯男。

立冬日作

忽見桃花出小紅。因驚十月起溫風。歲功不得歸顛項。冬令何堪付祝融。未有星辰能好雨。轉添雲氣漫成虹。蝦蟆蛺蝶偏如意。旦夕蜚鳴白露叢。

丙申歲十月還鄉作七首

溪上寒山淡落暉。溪邊風送客帆歸。故家文物今何在。平世人民半已非。華髮老翁啼進酒。蓬頭稚子笑牽衣。自嗟薄質行衰朽。未覩明廷賦采薇。風急霜飛天地寒。草黃木落水泉乾。千村亂後荒榛滿。孤客歸來杖淚看。野宿狐狸鳴戶外。巢居煙火出雲端。黍苗處處思陰雨。王粲詩成損肺肝。

故園梅蕊依時發。異縣歸人見卻悲。花自別來難獨立。人今老去復何之。未能荷鍤除叢棘。且可隨方着短籬。等待薰風暄暖後。枝間看取實離離。

手種庭前安石榴。開花結子到深秋。可憐枝葉從人折。尚有根株爲客留。枳枸悲風吹白日。若華高影隔青丘。壞垣蟋蟀知離恨。長夜淒涼弔獨愁。

舍北草池寒已枯。草中時復見菰蒲。濫泉臂沸無留鮒。弱藻蒙茸不繫鳧。綠葉紅花空代謝。春蛙秋蚓任喧呼。窺臨最憶琴高鯉。騰駕風雷定有無。

小舟衝雨清溪上。雨密溪深宿霧昏。游子到家無舊物。故人留客歎空尊。荒畦蔓草纏蒿草。落日青猿叫白猿。語罷不須還秉燭。耳聞目見總銷魂。

五載辭家未卜歸。歸來如客鬢成絲。親知過眼還成夢。事勢傷心不可思。且喜松楸仍舊日。莫嗟閭井異

前時修文偃武。君王意鑄甲銷戈。會有期。

冬至日泊舟戈溪

日薄雲陰雪在山。野寒溪靜客舟還。乾坤簸蕩逾三載。風俗乖張似百蠻。廢井衰蕪霜後白。空村喬木曉餘殷。獨憐節序逢冬至。不得安棲學閉關。

次韻和石末公紅樹詩

紅樹漫山駐歲華。玄冬驚見眼生花。井陘旗幟軍容盛。汴水帆檣御氣賒。春草淒迷金谷障。夕陽照灼赤城霞。靡萍丹木扶桑裏。惆悵誰乘博望槎。

次韻和石末公元夜之作

八表流雲澄夜色。九霄華月動春城。條風細細吹旗影。香藹微微引漏聲。河漢虹橋應斷絕。滄溟鼉足漫崢嶸。愁來更聽漁陽操。獨倚闌干坐到明。

石末公再賦元夕見寄用韻酬之

東方月出魚龍窟。北極雲開虎豹關。渤海青丘金作水。崑崙赤岸玉爲山。風光豈減常時好。燈火嗟逢此夜慳。聽盡殘鐘成不寐。那無飛羽入玄間。

丁酉七月十四夜望月仍蝕且旣而司天報亦不至因感去年作此寄石末公

山城望月中元夜。天運循環四序周。顧兔又從銀漢滅。磔臺空抱玉川憂。清臺視祲當箕尾。仙使乘槎隔斗牛。安得寄書憑去燕。爲言桂樹不勝秋。

題煙波泛舟圖

舊遊憶鼓湘湖櫂。日淨風微江練平。小艇曲穿花底出。遊魚相伴鏡中行。別來漫想心徒切。畫裏重看眼亦明。素石蒼松是何處。願從巢父濯冠纓。

爲王彥和賦槐堂

晉公庭上三槐樹。千載流傳是德符。今日耳孫思繼述。昔年手澤歎荒蕪。當窗欲看屯雲葉。夾徑先栽帶雨株。會見枝頭金粟蕊。秋風吹送上天衢。

社日偶成奉呈石末公

昔聞同社燕雞豚。今見操戈競一殮。松栢空壇飢鼠出。榜榆落日亂鴉喧。地連吳會嗟何蹙。民是周餘不半存。疎嬾渾愁聞世事。治豐有酒漫盈尊。

次韻和林彥文劉山驛作詩

青泥九折度危峯。翠木千章集遠風。欲爲流離安堡障。寧辭辛苦涉蒿蓬。梧桐葉落無棲鳳。荆棘枝寒有怨鴻。旦夕升虛聊望楚。何時重賦定方中。

次韻和余嘉賓御史見寄

二紀相思欲奮飛。百年心事苦相違。風塵跋涉容顏改。豺虎縱橫信使稀。忽枉緘書如見面。不勝悲喜卻沾衣。有懷欲語無由寫。驄馬天涯幾日歸。

次韻和石末公月蝕見寄

涼氣開秋桂未花。青天見月漫咨嗟。玉毫撲擲此中兔。金背熒煌何處蟬。百鍊精銅纔照膽。連城白壁底生瑕。誰能鼓劍披氛祲。莫遣東郊馬歎沙。

卽事有感呈石末公

葵藿傾心嚮大明。參商瑣瑣只尋兵。蛾眉欲擅三千寵。魚翼難通九萬程。貝錦笙簧鳴鳥瑞。明珠琢玉泰山輕。兩階干羽聞來格。分北猶勞聖主情。

次韻和石末公感懷之作

鳳去深林鷺在庭。西風回首故山青。杞人岌岌憂將殞。楚國茫茫醉不醒。自覺艱虞多錯午。誰憐耗斲祝寧丁。金芝玉蕨甘如蜜。歲晚吾從董五經。

聞盜過界首季君山甫亦蒙訪及以詩唁之

妖星何故犯奎躔。鶴上雲霄鯉入淵。寇退喜聞曾子反。書焚尙賴伏生傳。蠶酸併與青蠶去。瓜苦空餘綠蔓牽。慚愧杜郊湯博士。白鹽赤米數相憐。

次韻和石末公中秋翫月

一年二六團圓月。此夜光輝獨耐看。銀漢波濤三島接。玉京風露九霄寒。方欣酷暑隨時去。只恐清商促歲闌。更上南樓瞻北極。那無鴻鴈報平安。

次韻和十六夜月

纔圓又缺中天月。猶自寒光媚老蟾。承露仙人珠落掌。別風樓觀雪生簷。玉階桂影駸駸薄。金井苔花漸

漸添。坐久城頭聞夜柝。牢愁清興苦相兼。

再次韻

永夜涼風吹碧落。深秋白露洗明蟾。金波灑灑將流瓦。玉磔熒熒恰近簷。貝闕寒生魚腦滅。龍宮氣肅蚌胎添。從軍不廢篇章事。倚賴元侯智勇兼。

次韻和劉宗保秋懷二首

眼見賓鴻去復回。可堪雲霧隔瑤臺。黃花自在山中發。青鳥何由海上來。墻角蟲號瓜蔓索。樹頭禽嚇栗房開。涼蟾照幙還清夜。慚愧千村野哭哀。蛩螢啼露作悲愁。鷓鴣搏風樂素秋。莫訝繫匏長不食。亦知神劍解相求。翰林白髮三千丈。吏部回腸一萬周。借問何如青白眼。酣歌竟日爲身謀。

次韻和石末公九日無菊詩

籬菊無花冷夕陽。西風空送鴈還鄉。已妨少昊頒時令。更阻淵明泛酒觴。生意循環深自識。年華逝水去誰傷。愁來最愛霜中葉。滿眼殷紅間淺黃。

野行偶見紅樹悵然有感呈石末公

紅樹傷心夕照前。漫山暎水爲誰妍。樹當搖落人尤惜。人自憂愁樹不憐。九譯未通青鳥使。四郊猶漲綠林煙。野夫病足思休息。藉草棲檜擬晏眠。

次韻和石末公紅樹詩

岸柳江蒲總戚施。柏林辛苦擢金支。虞人詫見炎官傘。候騎訛傳漢將旗。照水熒煌空銜貌。因風飄落竟從誰。應慙若木生暘谷。長駐跋烏燭嶮巖。

次韻和石末公悲紅樹二首

乾坤何處非王土。稂莠誰令滿大田。未掃綠林千嶂裏。還看紅樹九秋前。吳宮露冷蟬何在。漢苑風悲鶴自憐。卻羨魯陽功德盛。揮戈回日至今傳。霜與秋林作錦幃。一朝霜重卻全稀。坐看絕豔成塵土。應寤浮華是禍機。驚鵲月明難自定。窮猿歲暮欲何歸。猶憐有客期歡賞。太息斯須志願違。

詔書到日喜雨呈石末公

將軍鐵馬高秋出。使者樓船渤海來。甘雨恰隨天詔下。凍雲應與地圖開。枯黃背日紛紛落。細綠迎春苒苒回。悵望山中多病客。坐看烏鵲遶庭梅。

感事呈石末公

前飛鷓鴣後駕鵝。天闊風高奈汝何。不羨焦頭居上客。空憐舐痔得車多。深山虎豹來城市。落日鼙鼙出薜蘿。薇蕨可羹魚可膾。白雲長自在岩阿。

贈西岩道元和尙

西岩寺裏雲巢子。不到人間幾十年。杖錫野猿迎路側。談經山鬼拜燈前。塵飛劫火青春夢。雪滿長松白日眠。近得淵明入蓮社。興來時復有詩篇。

題王伯衡縣尹桑陰圖

漁陽太守之官後。種得桑陰比召棠。麥隴風微雲委甸。茅簷日暖雪盈筐。倉庚過去青枝動。戴勝飛來紫椹香。千載先生同此意。爲君重賦兩岐章。

次韻和石末公漫興見寄二首

王侯古有興屠狗。郎吏今無善牧羊。青海風波騰罔象。紫霄氛祲翳搖光。江寒逝水東流急。天遠冥鴻北去長。莫笑烏鳶惡毛羽。翻飛齊得籛鴟行。濟世何人希管樂。隱居無處覓求羊。扶桑未換暘烏彩。腐草猶爭爝火光。百載承平戎馬佚。七年戰伐艾菅長。長沙遷客能流涕。一日須垂一萬行。

聞鳩鳴有感呈石末公

郊原過雨東作始。枝上鶉鳩鳴可憐。此地巢居猶葺壘。他鄉去子望歸田。匡時勢異民思漢。憂國心隨鴈到燕。逝水自流人自老。倚楹長憶至元年。

戲和石末公催太初畫山水之作

春蠶吐絲作成罽。辛苦爲人身上衣。畫史等閑揮彩筆。女工顛頓倚空機。高堂素壁峯巒出。暮雨朝雲夢寐歸。可恠唐朝杜陵老。瘦妻短褐有光輝。

和石末公冬暖

世亂干戈日夜尋。可堪災沴又相侵。煙霞出地皆成祲。雷電飛時肯作霖。祝錫漫勞遵故事。問牛誰復軫

憂心小蟲未寤年光晚。猶抱枯荻學苦吟。

雨中呈石末公

去年三冬暖不雨。今年孟春寒有餘。大雲垂垂壓宇宙。密雪袞袞飄庭除。安排白水與泛舸。醞釀青泥容沒車。辛苦陌頭楊柳樹。含顰等待太陽舒。

和石末公見示盲字韻

長想天涯皆內地。忍看關外卽他鄉。扶生可惜豎無緩。救死寧堪鬼在盲。郡縣誅求應到骨。乾坤戰伐徧成瘡。遼東華表雲間鶴。相見相思總斷腸。

次李子庚韻

風落餘花春事非。愁心煙雨共霏霏。溪雲不作從龍起。山石何須學燕飛。籬下舊存彭澤菊。林間新長首陽薇。夜闌忽漫聞啼鳥。腸斷天涯信使稀。

早春遣懷

正月餘寒未放春。漫空飛雪舞隨人。新年對客情何限。濁酒於予意獨親。澗底流泉渾似玉。門前細草總成茵。鶴歸自愛山能靜。豹隱方知霧有神。

雨中遣悶

雨漬愁雲重不飛。山蒸冷霧襲人衣。亦知屏翳空多事。只恐羲和失所歸。歲晏波濤東逝急。天寒鴻鴈北來稀。殘燈永夜清無焰。坐聽飢猿響翠微。

聞猿有感

猿響秋山夜向闌。白雲如雪擁林端。鍾儀楚奏難成調。蔡琰胡笳欲罷彈。澤畔離騷餘怨恨。巴東涕淚想洸瀾。唯應華表歸來鶴。明月清風共歲寒。

漫成

老去知心更有誰。愁將短髮對花枝。花殘更發新春葉。髮白空垂滿面絲。縱酒放歌憐往日。倚闌聽鴈立多時。若爲化得搏風翮。汗漫東西信所之。

感興

百年彊半已無能。愁入膏盲病自增。千里江山雙白髮。五更風雨一青燈。繁弦急管誰家宅。廢圃荒窳昔代陵。不寐坐聽雞唱盡。素光穿牖日華升。

夜坐

殘缸背壁翳還明。坐擁衾裯閱五更。雲捲星河垂永夜。霜飛鼓角靜嚴城。飄搖莫計餘生事。老病都非舊日情。想像故園憑夢到。愁來轉使夢難成。

蔣山寺十月桃花

王母桃花此地栽。風霜搖落爲誰開。琳宮玉座同黃土。絳蕊丹跗自綠苔。度朔煙霞違夢想。武陵雲水怨歸來。殘蜂剩蝶相逢淺。黃菊芙蓉莫浪猜。

寒夜

月上前山夜寂寥。江城鼓角殷寒宵。魚龍水落滄溟靜。鴻鴈聲來紫塞遙。風物自應隨律轉。霜髯爭得見春消。青釭冷暗愁眠怯。樓外頻移北斗杓。

漫成

愁將短髮逢搖落。漫把殘燈照寂寥。兩地身心悲夜鵲。五更鍾鼓夢春潮。驚寒栢葉垂垂靜。向日霜華泫泫消。悵望煙塵滿長路。紫芝空長故山苗。

題秋江獨釣圖

秋風江上垂綸客。知是嚴陵是太公。細水浮嵐天與碧。斜陽炙面臉生紅。形容想像丹青在。歲月荒涼草澤空。日暮忽然聞欸乃。蓼花楓葉忘西東。

題墨竹

蒼梧山下無窮竹。盡是湘妃淚種成。煙雨不銷千古恨。珮環虛度九秋聲。見愁牧豎乘時伐。可待伶倫學鳳鳴。獨立淒涼對圖畫。爲君惆悵一沾纓。

雪中有懷章三益葉景淵

歲莫懷人雪滿天。飢烏病客對淒然。地爐無火同誰坐。石硯生水盡日眠。栗里何時歸白髮。茅簷幾處起青煙。稻畦麥隴看春及。土膏泉滋識有年。

白髮

白髮應同春草莖。風吹一夜滿頭生。欲收浮豔歸根柢。故遣芳菲定老成。碧瓦曉霜憐變滅。紙窗宵月妬

分明據鞍上馬非吾事。賴爾粧嚴意不輕。

愁感代哭

燕鴻北去又南來。斷壘荒岡幾劫灰。慈母磯寒風落木。望夫石老雨添苔。江流定與天河合。客淚還經地底回。未必春光便銷歇。白華猶發燒殘梅。

冬至

冬至微陽幹化機。閉關獨坐正相宜。白楊風掃經霜葉。翠柏氷凝泣露枝。日轉天南林影覺。春生地底水泉知。物華過眼成今古。愁絕看雲有所思。

黃州團湖董氏鏡心樓

團湖四面開明鏡。中有高樓接泰清。絳氣往來蟾影入。碧光浮動日華生。雲間威鳳孤飛下。空裏遊魚作隊行。安得翠輶呼弄玉。金銀臺上臥吹笙。

寄黃仲美

二十年前別故人。乾坤何處不風塵。玉缸阻對簷花夕。素髮羞同野草春。紫極星辰空有象。青冥波浪杳無津。歡華過眼成今昔。苦憶元方淚滿巾。

春城

春盡江城不見花。似知白髮畏韶華。戰爭故習俱無賴。喪亂餘生未有涯。三鳥虹蜺昏日月。二儀風雨化龍蛇。何年百谷歸滄海。尋取河源泛客槎。

舟中

雨翳青燈靜客舟。輕寒只戀敝貂裘。漫山薄霧穿牕濕。漱石鳴泉拍枕流。身在壺中天萬里。夢驚華表鶴千秋。愁來滴淚都成血。直到滄溟水盡頭。

至婺州聞官軍自溫處之江東所過皆空遂從間道還鄉

聞道人家總避軍。我亦獨穿豺虎羣。莫思身外路多棘。且喜雨晴山出雲。林端石磴鶻自占。澗底風松猿共聞。他年想象或夢到。兩鬢白雪應紛紛。

遣興

白露如珠滴素秋。啼螿絡緯寂然收。煙開碧水浮天遠。月帶銀河入海流。艷艷霜林張綺纈。琤琤風葉落鳴球。此時旅客籌燈坐。無奈黃昏一餉愁。

搖落

搖落江天氣慘淒。野黃雲白惑東西。可憐飢鼠當人立。無奈寒鴉向客啼。杳杳夕陽葭浦闊。茫茫秋水稻田低。銷魂何地歸衰疾。觸處煙塵沸鼓鼙。

秋夕

柏葉蕭疎柳葉黃。露華如玉綴空廊。丹心欲共燈花結。白髮偏隨漏水長。月色故園同窈窕。蟲聲此夜獨淒涼。寒鴉莫更啼金井。衰病能堪幾斷腸。

感興七首

昭代仁聲浹九夷。野無矛戟有鋌基。誰言潢海操兵釁。卻產宮庭制禮時。廣路駢駢周四牡。陰風肅肅漢靈旗。弔民伐罪元戎事。盱食宵衣上聖思。
清時不樂道干戈。鼯鼠其如虎豹何。淮海風雲連鼓角。湖山花木怨笙歌。紫微畫省青煙入。細柳空營白骨多。惆悵無人奏丹扆。側身長望涕滂沱。
衣冠共喜際雍熙。豈意豺狼負盛時。禮樂百年忘戰久。風雲八陣得才遲。神謀不是閭閻識。廟筭誰聞黜戾思。慚愧鰕生懶無用。江湖愁望鬢成絲。
將軍意氣薄丹霄。欲把孤航截海潮。蘇武節來無忌死。岑彭營惡子陽驕。鳴鴉詩奏忠誰白。松柏歌成恨豈銷。悵望天涯一灑淚。鯨鯢罔象雜三苗。
落日悲風雲滿川。家家閉戶少炊煙。也知渤海無龔遂。漫憶邯鄲有魯連。三尺青萍思出匣。數莖白髮望歸田。請看如鏡南樓月。此夜清光最可憐。
天弧不解射封狼。戰骨縱橫滿路傍。古戍有狐鳴夜月。高岡無鳳集朝陽。瑠戈畫戟空文物。廢井頽垣自雪霜。漫說漢庭思李牧。未聞郎署遣馮唐。
天上九關森虎豹。人間七澤起龍蛇。塵埃不辨風雲色。雨露全歸枳棘花。秦國有人迷鹿馬。周郊無土載蟲沙。淮濱何日歌常武。腸斷嚴城戍鼓撾。

越山亭晚望

越絕孤城枕海湄。越王亭下景遲遲。雲埋夏后歲書冗。草沒秦皇頌德碑。鑿齒未馴虞禮樂。戈船猶駐漢

旂旗着風灑灑。吹楊柳笑看吳鉞有所思。

謁夏王廟有感

一片宮垣粉牋新。前王陵廟在松筠。玉書金簡歸天地。貝葉曇花詫鬼神。滄海波濤紆職貢。山川草木望時巡。苗頑未狎虞階舞。空使忠良淚滿巾。

寒夜忽然有懷周紫巖先生遂成口號奉寄且以酬黃柑之惠

柱下先生住紫巖。倚天愁嶺氣巉巖。客來每託青猿報。書寄還憑白鳳銜。日上寒光生水石。月明晴翠落松杉。旅人珍重黃柑贈。愧乏瓊瑤答素緘。

冬暖

今年南國天氣暖。十月赤城桃有花。江楓未肯換故色。汀草強欲抽新芽。野畦落日舞殘蝶。小池過雨喧鳴蛙。城上幾時罷擊柝。愁見海雲蒸晚霞。

漫成

春雨日日送愁來。雨中百花渾未開。青山不見神禹冗。碧草已滿越王臺。魚兒弄水浮還沒。燕子尋巢去卻回。頭白揚雄嬾獻賦。衡門從此掩蒿萊。

夏日雜興七首

眼見青苔上短垣。忽看碧草翳衡門。西來急雨寒聲壯。東望扶桑曉氣昏。征戍誅求三載外。詩書禮樂幾家存。天涯地角風塵滿。極目雲霄漫斷魂。

愛此南園僻有餘。依稀景物似郊居。風軒自舞蒼筤竹。蓮沼雙遊赤鯉魚。釀酒剩收元亮秫。換鵝時寫右軍書。人生縱意惟踈嬾。莫遣門多長者車。

聞道中原沸似糜。倚楹長嘯不勝悲。百年城郭連烽火。千里桑麻委蒺藜。南國久紆方叔旆。東郊未返魯侯旗。五湖何處堪垂釣。腸斷松楸入夢思。

故里無書問遠遊。他鄉萍梗漫淹留。盲風恠雨蚊龍喜。荒楚寒蕪燕雀愁。天上古今星北拱。人間日夜水東流。誰能走報西王母。乞與還丹駐黑頭。

層樓迢遞俯清郊。天際羣山檻外交。日暖水禽鳴哺子。風輕沙燕語尋巢。綠荷雨洗藏龜葉。翠竹煙寒集鳳梢。可嘆仲宣歸未得。苦吟終日倚衡茅。

夏至陰生景漸催。百年已半亦堪哀。蒼鱗不入龍鰲夢。鐵羽何勞燕雀猜。雨砌蟬花粘碧草。風簷螢火出蒼苔。細觀景物宜消遣。寥落兼無濁酒杯。

菱葉荷花漸滿池。紅榴綠篠正相宜。天邊日出園葵覺。地底雲生柱礎知。長夏未應炎暑過。薄寒恰似晚秋時。朝來苦恠雙青鬢。輒向風前學素絲。

夏日訪王友文留飲贈詩

長夏園林白晝閑。高軒留客雨漫山。傾壺竹葉沉沉綠。落樹楊梅顆顆殷。檻外新荷搖水佩。簷前弱柳舞風鬢。醉來帶月浮舟去。忘卻塵埃世路艱。

題江村風雨圖

日落千山風雨來。野昏林黑鳥飛迴。風吹煙霧連天起。雨送雷霆入地回。龍母蛟綰雲半濕。巫娥具闕夜深開。暮寒燕子歸華屋。愁絕餘花委碧苔。

次韻和岳季堅見寄

塵埃不見望諸君。江海誰憐鄭廣文。雪裏一筇穿虎出。竹間半榻與僧分。無人問字朝眠穩。有客論詩夜坐勤。豹褻羊裘等黃土。金章紫綬漫浮雲。

次韻和天童良上人見寄

不辭塵匣掩青萍。願見天邊隕盜星。白日有時容黑子。紫微終古照玄冥。輕風淪雪歸蘭汜。細雨涵春入草亭。但得此身強健在。江山相見眼長青。

靈峯寺松風閣

靈峯寺閣倚松風。風細松高閣更空。何處流泉生石上。有人鳴玉下雲中。花飄霧露春香滿。影動龍蛇曉日融。安得身如列禦寇。翩翩高舉出冥鴻。

次韻高則誠雨中三首

短棹孤蓬訪昔遊。冷風淒雨不勝愁。江湖滿地蛟螭浪。秔稻連天鼠雀秋。莫恠賈生偏善哭。從來杞國最多憂。絕憐窗外如珪月。只爲離人照白頭。霖雨蕭蕭泥客途。歲華冉冉隙中徂。不知燕趙車千乘。何似嵩邛飯一盂。露冷芙蓉捐玉佩。天寒薏苡結明珠。東鄰艇子如堪借。去釣松江巨口魚。

吳苑西風禾黍黃。越鄉倦客葛衣涼。楸梧夜冷烏驚樹。霜露秋清蜂閉房。天上出車無召虎。人間賣卜有王郎。干戈滿日難回首。夢到空山月滿堂。

次韻和謙上人秋興七首

一自中原萬馬奔。江淮今有幾州存。龍韜豹略癡兒戲。穰李天桃猛士門。廢壘秋風銷戰骨。荒郊夜雨泣冤魂。江湖愁絕無家客。佇立看天淚眼昏。

東海波濤激迅颺。西風氛霧虎狼驕。高牙畫戟尊方伯。繡段黃封出內朝。無客金戈椿鑿齒。有人玉帳舞弓腰。武陵日暮桃花盡。何處林泉可採樵。

霜飛大野氣淒清。日落荒村少客行。投筆班超空食肉。登樓王粲獨傷情。海壖雨翳旌旗影。淮甸雲埋鼓角聲。中夜起瞻天北極。鬢毛蕭颯憶神京。

浙江流水繞東吳。佳麗猶傳故國都。紅錦漫山春雨後。黃雲壓樹曉霜餘。嬌鶯逐暖歸牙帳。征鴈衝寒送羽書。惆悵南園釣舟子。蒺藜滿地不勝鋤。

繡幕香幃隱日華。金鞍玉轡巧矜誇。深山霧雨羆生虎。大海波濤虺作蛇。樛櫨有枝寒集鵲。梧桐無葉夜啼鴉。涼風嫋嫋吹游子。何處松楸是汝家。

故鄉知己不曾逢。滿目雲山恨萬重。斥壘霜清寒夜柝。譙樓風急曉城鐘。此時遶樹憐烏鵲。異縣携家想甌蛩。獨向晴簷問梅蘂。數枝和雪爲誰容。

江上悲風起白波。山中芳草奈愁何。紫菱青荇鮫人舞。翠藟蒼藤木客歌。曠野煙塵迷虎兕。長亭泥濘沒

驪驅濁河日夜東流去腸斷霓旌影駸娑

法華山弘上人

可愛寒潭似鏡清。清光寒氣襲軒楹。草根流水冷冷出。石上潛魚箇箇橫。翠藹驚風和露滴。白沙得雨照人明。故鄉近報猶豺虎。愁對滄浪詠濯纓。

自天衣還城贈伯言

城上餘寒曉氣凝。湖邊春樹綠層層。一山獨表秦王望。衆水皆朝夏后陵。白眼嗣宗終嗜酒。青鞋子美曠尋僧。仙都石室煙霞裏。早晚相携策瘦藤。

爲黃元微題畫松

黃子宅邊松十尋。兩株相倚自成林。半空鸞鳳翻清影。長日笙竽奏好音。豈但茯苓能卻老。更有琥珀可安心。風塵瀕洞還相憶。寫掛高軒恨最深。

秋感

日白天青木葉凋。雲山漫漫故鄉遙。石床墜露珠光動。碧砌幽花玉色銷。十載故人俱土壤。五更歸夢負漁樵。懷來憶往成惆悵。蔓草羈蟲對寂寥。

悼廢圃殘菊

舊菊將蕪尚有根。高秋相顧耿無言。芳心不共青莎死。生態猶欺白露繁。要待靈均餐落蕊。從教元亮耻空尊。何人解識淒涼意。分付寒蟄仔細論。

侍宴鍾山應制 時蘭州方奏捷

清和天氣雨晴時。翠麥黃花夾路岐。萬里玉關馳露布。九霄金闕絢雲旗。龍文騶駟驂鸞輅。馬乳蒲萄入羽卮。衰老自慚無補報。叨陪儀鳳侍瑤池。

題李息齋墨竹

李侯貌出蒼筤竹。葉上湘妃淚未乾。煙雨晝迷丹鸞鷺。霜風秋勁碧琅玕。脩莖擬截伶倫管。和氣潛驅嶰谷寒。此意祇令誰賞識。高堂素壁靜時看。

雲門寺作

若耶溪頭過新雨。雲門寺前芳草長。好將薜荔紉衣帶。更取辛荑結佩纒。綠鬢朱顏非昔日。茂林修竹是他鄉。東風且莫吹花盡。遠客傷春易斷腸。

次韻和朱伯言自雲門之天衣途中作

卽看梅蕊發江南。漸見柔桑可浴蠶。日鑄雨餘峯似髻。雲門煙合樹如藍。青猿不避游人過。碧澗能消宿酒酣。況有山僧頗解事。何妨聊駐使君驂。

送陳子晟省親歸連江

連江此去三千里。綵服趨庭及早春。閩嶺白雲迎馬首。建溪碧水喚龍鱗。題橋兔穎留南徼。戀闕丹心照北辰。鶴髮正須三釜養。鳳城雨露四時新。

送黃生泄祀福建

九重發政懷川嶽。使者承宣下紫宸。玉瓚黃流敷帝澤。碧雞金馬出神珍。風清五嶺煙霞肅。春到三山雨露勻。歸路武夷溪九曲。棠梨花映綠楊津。

卽事

春半餘寒似暮秋。掩門高坐日悠悠。樹頭獨立知風鵲。屋角雙鳴喚雨鳩。芳意自隨流水逝。華年不爲老人留。浮花冶葉休相笑。自古英賢總一漚。

遣興

江上潮來風捲沙。城頭畢逋烏尾訛。燕泥半濕昨夜雨。蛛網忽粘何處花。孤坐日月自閑暇。出門岐路空交加。漫將白髮對芳草。目送去鴻天一涯。

乙卯歲首早朝奉天殿東翰林大本堂諸友

枝上鳴嚶報早春。御溝波澹碧龍鱗。旂常影動千官肅。環珮聲來萬國賓。若乳露從霄漢落。非煙雲抱翠華新。從臣才俊俱楊馬。白首無能媿老身。

元夜

玉漏遲遲出苑牆。星河踈淡月輝煌。送寒梅藥清香細。報喜燈花紫燄光。金闕曉霞來若木。瑤池春色滿長楊。君王注意防驕佚。萬歲千秋樂未央。

次韻和劉彥箕憶山中篇

句曲峯高倚太陽。不風巖谷自清涼。四時嵐彩霏瓊雪。百道泉流湛玉霜。雅稱采芝追綺季。尤宜散髮學

嵇康龍鱗錯松當徑。鳳尾禰旌竹過牆。月上海門蟾早覺。露寒天宇鶴先嘗。仙人卓劍降魍魅。道士書符禁瑤狂。寶氣丹光生夜寂。黃精白朮引年長。茅君虎臥瑤壇上。蕭史鸞棲碧殿旁。桂樹寒山違謝客。桃花流水憶劉郎。猿狵任占青蘿帳。薛荔從生綠石床。世難有身空自累。詩成無鴈倩誰將。欲憑錦瑟傳幽思。才理朱絃意已忘。

彭澤阻風

風急雲飛江倒流。請君聊且駐蘭舟。浪翻彭蠡蛟螭橫。雲壓匡廬虎豹幽。懷古謾尋元亮菊。望鄉空倚仲宣樓。五更歸夢三千里。一日迴腸九萬周。嘯侶山棲憐野鹿。伴人水宿感沙鷗。中元都府神官會。上界星辰積氣浮。地軸西南連少昊。天關東北鎖陽侯。兩峯對擁青螺髻。孤月初生白玉鉤。龍甲冷欺獰蜃市。蚌胎光奪睡龍眸。春撞急杵濤驚枕。滴瀝真珠霞洒綸。枯樹掛崖眠復起。老藤牽石墜還留。宮商調合靈鐘夕。銛鏗稜高峭壁秋。繡被焚香寒悄悄。金環扣瑟夜悠悠。竹枝寫恨傳巴女。木客長吟答楚囚。不寐殘缸猶閃滅。動情鳴櫓數啞謳。蒼梧鳳逐重華去。赤水珠無罔象求。大宅高門荒町曠。頽垣敗塚鬧鶻鷗。塵埃漠漠城笳怨。蘆荻蕭蕭戍鼓愁。鬼火碧穿燈火去。狼煙黃入燒煙遶。紫芝可茹林多蚌。紅鯉堪罾澤有虬。萬國鋤犂俱劍戟。八陵松柏讓戈矛。哀哀野哭乾坤慘。踽踽途行面目醜。永憶盧敖翔汗漫。願隨慧遠學清修。瑤臺青鳥歸何處。玄圃琪華爛莫收。滄海未容精衛塞。蓬萊定許偃佺遊。故園梅蕊相將發。倚賴春陽慰白頭。

誠意伯文集卷之十七

五言絕句

題梅屏二絕

樹杪過流星。輕霜落半庭。
踈花與孤客。相對一青燈。
獨酌梅花下。憐花與鬢同。
折花還插鬢。顛倒笑東風。

題小畫

庭前綠荷葉。香氣濃於酒。
踈雨忽飛來。的皜明珠走。

春晚

踈雨隨風過。輕寒薄暮歸。
猶憐數花朵。辛苦駐春輝。

遣興

於越三年客。思家一百旬。
如何今夜月。卻憶鏡湖春。

歲晏

歲晏悲風急。空江白晝陰。
黃蘆與紅蓼。無處不傷心。

途中見去鴈

昔與鴈同歸。今來鴈北飛。殷勤祝過鴈。來往莫相違。

漫成 九首

春曉正堪睡。嫌他牕上明。無端雙楚雀。又向屋頭鳴。
明月圓復缺。春風去不來。淚隨花雨落。點點在蒼苔。
昨夜三更裏。還鄉夢卻成。朦朧半驚覺。連喚小兒名。
日暮庭陰合。斜陽復照簷。不禁風絮亂。寂寞掩重簾。
病身勞應接。長日掩雙扉。燕子來何晚。春歸寒未歸。
炎赫迎新節。綈袍洗未乾。那知一夜雨。更作九秋寒。
萱草花空發。丁香子又生。浮雲無處所。孤月不須明。
淚爲看花落。愁因對酒多。良辰不再得。衰莫欲如何。
望帝千年魄。聲聲是淚流。空庭無竹樹。省得一春愁。

題墨竹

風梢舞空烟。露葉滴晴月。折取寄情人。感此歲寒節。

六言絕句

題山水小畫二首

鄂渚輕舟未發。瀟湘倦客多愁。可恨一江春水。無情日夜東流。
碧草桃源路斷。紫芝商嶺雲深。高樹月明啼鴉。一聲一度傷心。

題畫竹

葉間重露猶滴。林表寒烟未開。想見沅湘江上。月明環佩歸來。

七言絕句

題畫梅

天桃能紫杏能紅。滿面塵埃怯晚風。爭似羅浮山礪底。一枝清冷月明中。

讀史有感

千古懷沙恨逐臣。章臺遺事最酸辛。可憐日暮高唐夢。繞盡行雲不到秦。

分賦臺

突兀高臺壘土成。人言暴客此分贏。飲泉清節今寥落。可但梁山獨擅名。

漫成

階下青苔砌上莎。春深烟雨自相和。幽蘭生在空山裏。縱有清香奈爾何。

春雨三絕句

春雨和風細細來。園林取次發枯荄。古墻芳草無生處。一滴還成一點苔。

翠麥黃花爛熳春。蒼顏皓首別離人。相看一笑渾成夢。又見汀洲老白蘋。
一雨如膏五日泥。長烟不散草萋萋。殷勤分付墻邊柳。爲挽流鶯自在啼。

秋興二首

嫋嫋西風起白蘋。妖紅媚綠看成塵。九衢車馬如流水。盡是邯鄲夢裏人。
梁間燕子去悠悠。絡緯寒蟬管領秋。誰遣莊周化胡蝶。不勝憔悴爲花愁。

題梧桐折枝翎毛圖

瓊柯碧葉兩參差。又是西風白露時。鳳鳥不來嘉實晚。小禽啣上最高枝。

題竹根小禽圖

竹露無聲墜碧柯。小禽相對啄秋莎。江湖鴈鷺肥粱稻。鱗繳連天雨霧多。

題畫貓

碧眼烏圓食有魚。仰看胡蝶坐階除。春風漾漾吹花影。一任東郊鼠化鴽。

過閩關

天上絲綸啓玉封。歡聲雷動八州同。閩江渺渺通炎海。添作恩波到日東。

題竹木石圖二首

凌霜傲雪無人問。拂水梢雲意自閑。願就姮娥借明月。臥看鸞鳳舞空山。
古木蕭森傍水隈。鳳凰飛去不飛回。披煙細看蒼莨葉。知是湘君淚濕來。

題蟹二首

殼鬪犀函手鬪兵。沙堤潮落可橫行。稻根香軟蘆根美。未覺江山酒興生。
擁劍橫行氣象豪。渾疑縑素是波濤。能令吻角流饒沫。莫向牕前啗老饕。

題枯木圖

幹排風雨三千尺。根老冰泉八百年。不用江頭喚元緒。何妨湖上識神仙。

題陳太初畫扇

炎天玉爍水銀流。琴上薰風可解憂。不負吾皇麟趾意。只今誰是富民侯。

詠史

姦雄盜竊幸傾危。只道冥冥便可欺。想得民心思漢日。正當楊子劇秦時。

遣興

一炷清香一卷書。此身安處是吾廬。綠槐翠柏宜長日。門外何須長者車。

題明皇幸蜀圖

斜陽慘淡照霓旌。石棧縈紆僕馬羸。想得林間子規鳥。斷崖青壁亦相隨。

裂帛聲中發禍機。白華歌斷草菲菲。可憐蜀道三軍恨。不記他年武惠妃。

題柯敬仲墨竹

蒼龍倒掛不入地。回首卻攀雲上天。夜深雲散明月出。化作脩篁舞翠烟。

移梅亭

貫石梢雲一樹梅。誰教移向畫堂栽。月涼夜色清如水。其那樓頭玉笛哀。

題趙仲穆畫眉圖

有美清揚婉且閑。橫雲吐月鬪彎環。平生不識張京兆。卻對粧臺寫遠山。含簧茹管細相和。語困春風意更多。驚起佳人應有恨。雙蛾蹙損不成歌。

題畫山水

澹澹輕煙羃半林。涓涓飛瀑瀉遙岑。偶然坐石觀流水。不記還山路淺深。

題石末元帥扇上有陳太初畫松

老松根幹如鐵石。般匠不知空谷深。永夜高風吹萬竅。商聲滿地作龍吟。

題渭橋圖

百戰平城憤未銷。武皇赫怒屬天驕。可憐陵樹秋風後。貂帽駝裘拜渭橋。皆春亭

題小景

草色青青日色黃。暖煙烘露百花香。曉窗夢入桃園去。驚覺啼鶯在綠楊。江頭日日起西風。江樹驚寒葉變紅。天澹雲低何處鴈。一行飛下荻花中。

題梅花小禽圖

三鳥翩翩海上來。一雙飛去入瑤臺。可憐鍛羽空山裏。獨立寒枝怨野梅。

題湖山煙雨圖

湖上青山煙雨寒。湖中一棹欲歸難。白蘋白老東風裏。腸斷黃昏獨倚闌。

若耶溪上雨聲來。秦望山前霧不開。欲渡鏡湖尋禹穴。蒼藤翠木斷猿哀。

次韻和王文明絕句漫興十八首

芙蓉湖上夕陽低。楊柳枝頭一鳥棲。獨倚闌干看山色。白雲飛過若耶溪。

年華如水去堂堂。何處無愁不斷腸。天上羣僊風雨外。人間明月夜淒涼。

解印淵明柳映門。床頭酒盡臥空尊。牕風吹破羲皇夢。閑看山雲起石根。

竹根草葉垂書帶。苔面蝸涎學篆文。坐到博山香燼歇。不知新月出微雲。

眼見繁花開滿林。卽看嫩葉綠成陰。杜鵑啼落西山月。一夜相思萬里心。

澹澹輕風冷透衣。冥冥細雨客思歸。若爲化得遼東鶴。遠逐浮雲汗漫飛。

天邊雲氣來須女。湖上輕雷起少男。一陣微涼踈雨過。滿池蓮蕊綠如簪。

風翻竹擗空林響。雨絕蛛絲落蕊縣。長日掩關無客到。一眉山水對嬋娟。

江北江南幾驛亭。可憐強半草青青。夜涼月白西湖水。坐看三台上將星。

舊游何處渺煙蘿。幾度相思夢玉珂。莫向天涯苦回首。野猿木客恣經過。

東海鯨鯢倒百川。西江波浪阻征舡。誰能散髮空山裏。學取希夷石上眠。

夢裏分明到廣寒。夢回月落斗闌干。碧桃吹盡無人覺。滿袖西風涕泗漣。
曉晴何處一黃鸝。飛上花枝款款啼。獨坐小窗歌伐木。偶然懷古憶祈奚。
釣得槎頭縮頸魚。隔牆有酒貫錢酤。近來酒價如珠玉。獨飲千錢不要扶。
樓頭新月鬪弓彎。樓外青山對客閑。深夜忽然思往事。夢隨孤鶴遠雲間。
一自江淮作戰場。城池無處不金湯。轅門須識黃公略。莫與蕭娘競粉粧。
草廬不枉達官車。長日惟消滿架書。睡足北牕清似水。數聲殘角起城烏。
故鄉蛇豕滿柴荆。異域風塵嘆此生。至竟迂狂成淩落。可憐天地一浮萍。

題美人書紅葉圖

紅葉隨波豈自由。綵毫空復寫綢繆。無人解識詩中意。天上塵間總是愁。

送鮑生之閩中

青青芳草夾長堤。漠漠輕煙送馬蹄。他日相思建溪上。棠梨花發鷓鴣啼。

題米氏小景二首

陌上春風紫翠重。煙含汀樹淡還濃。夜來水漲溪橋斷。應是雷霆起蟄龍。
春霧昏昏雨散絲。溪流拍岸小橋危。猿啼鳥叫山鬼出。正是行人腸斷時。

題安石蒲葵圖

東山導騎出巖阿。能使枯蒲貴綺羅。卻恨卞和無祿位。中宵抱玉淚成河。

題滄江獨釣圖

山繞滄江一釣舡。又隨斜日下長川。小魚不食大魚去。風定遠林生白煙。
題二喬圖

江上桃花紅粉腮。偶然吹入玉堂來。東風日暮和煙雨。多少飄零委綠苔。
題小畫

夕陽山下水鱗鱗。一葉輕舟釣白蘋。謾道江湖堪浪跡。荻花風雨更愁人。
惆悵二首

紫薇花樹小樓東。日炙霞蒸似錦紅。過了春風到秋露。可堪零落碧苔中。
與君爲別幾清秋。鴻鴈來時輒上樓。今日倚樓無鴈過。斷腸風水隔瀛洲。
次韻和石末公見寄五絕

榑楠割截爲椽杙。歲暮搜材到柞薪。悵望無因見夏后。再平水土敝黎倫。
廟略能回十萬夫。詩書卻穀近來無。何由入奏明光殿。指點山河一統圖。
春滿郊原樂意融。野花庭草競纖穠。惟餘陵上青青柏。不向東風改舊容。
越溪清水淬干將。鬼魅驚啼畏夜光。不共鉛刀爭利鈍。何妨玉匣且深藏。
漢殿千門錦繡開。不堪一夜柏梁災。魯般骨朽蕭何死。腸斷無人爲取材。

過蘇州九首

姑蘇臺下垂楊柳。曾爲張王護禁城。今日淡煙芳草裏。暮蟬猶作管絃聲。
姑蘇臺下垂楊柳。落葉蕭蕭日暮風。天地山河有真主。迎來送往總成空。
憶昔吳宮無事時。滿城楊柳舞西施。如今柳盡西施死。恨殺當年陌上兒。
陌上清歌最可聽。誰知此是斷腸聲。就中更有楊枝曲。恨殺昏鴉及曉鶯。
虎丘山下月朦朧。闔闔門前動地風。子夜一聲琴一闋。杜鵑聲在碧雲中。
燈映前牕紙不鳴。四隣無語犬號聲。南陽已起爲霖了。何用人間更得名。
滿地寒風滿面塵。荒煙白草舊通津。晏安酖毒俱亡國。可但西施解悞人。
成敗由天衆所知。烏江拔劍更何疑。誰言碧海刺蛟手。也學臨春井底兒。
小雨如膏瀆陌塵。一溝寒碧曉生鱗。餘年已自無多子。更向途中見早春。

題畫菜戲呈石末公

列鼎羔羊厭膾肥。園官菜把莫嫌微。年來騎士工隳突。此物人間亦見稀。

漢世祖

白水龍飛紹赤精。鷓鴣盡入太官羹。三驅只貸樊崇死。侯印應慙不義名。

涼夜

瀟瀟涼雨瀉簷瀧。聒聒鳴蛙似吠龐。惟有露螢憐寂寞。卻將光景到書牕。

五月十九日大雨

風驅急雨灑高城。雲壓輕雷般地聲。雨過不知龍去處。一池草色萬蛙鳴。
次韻和石末公二絕

橐裏金多嫂自迎。殼中珠滿蚌能明。文犀亦有通靈角。天上龍彫盡可撻。
徒聞彈缺怨無魚。未見兼程貢蠟書。四海城池總完璧。只今誰是藺相如。
白塔寺

物換星移事已迷。從來此地惑東西。可憐如鏡中天月。獨照城烏夜夜啼。

題風中水仙花圖

癡妬封家十八姨。不爭好惡故相欺。沅湘日暮波濤起。翠蕩瑤翻欲渡遲。

送醫士賈思誠還浙東二首

西風嫋嫋水鱗鱗。一曲離歌淚滿巾。殘柳數株鷗數點。夕陽江上送歸人。
落木長亭獨客回。蹇驢聊可當鶩駘。還山須種千株杏。等待仙華道士來。

絕句漫興七首

一歲三春好景光。紛紛紅紫競芬芳。芙蓉亦有傾城色。不見東風卻拒霜。
風散螢光夜未分。隔窗涼雨落紛紛。秋衾不與還鄉夢。征鴈南來獨自聞。
碧瓦涼生月欲流。露蛩楓葉共啼秋。城烏半夜驚飛起。只爲離人白盡頭。
多事池邊促織兒。聲聲哀怨旅魂知。干戈滿地無機杼。長夜辛勤說與誰。

伐木丁丁谷響傳。樅楠櫟楸共成煙。扶桑不是人間樹。因見滄溟變稻田。
愁極每將歌當哭。歸來不覺笑成狂。蓬山縹緲鯨鯢外。一夕相思九斷腸。
永夜西風嫋嫋來。露華如玉委蒼苔。碧雞啼落山頭月。腸斷槐根夢不回。

憶昔二首

憶昔上林花發時。黃蜂撩亂蝶參差。如今花落枯枝在。付與秋蟲掛網絲。
憶昔揚州看月華。滿城絃管滿人家。可憐今夜中秋月。獨照寒蛩泣細沙。

呼燈

溽暑蒸人百體柔。中宵揮汗想清秋。西風一夜吹庭樹。驚起呼燈問敝裘。

磨石岡作

磨石岡頭雲濕衣。謝公墩上雨霏霏。西風忽捲殘陽出。臨水登山忘卻歸。

夜坐二首

露泣寒蟬暗斷魂。風驚簷鐸語黃昏。羈愁悄悄成危坐。看盡空墻上月痕。
蟲響莓苔葉響廊。月光如雪露如霜。銅壺管領催華髮。一夜應添百刻長。

送別

送別江頭日欲沉。落潮風急鳥歸林。秋雲恰似人情薄。秋水還同客恨深。

無寐

夜長無寐待鳴雞。及至雞鳴夢卻迷。驚起朝陽斜照屋。一眉殘月在天西。
棲鳥

歸鴈將秋入楚天。薄雲開月伴愁眠。露寒葉動棲鳥起。一叫千聲落枕邊。
義和

斷梗枯莖付野蒿。冷風涼雨剝征袍。義和只在嵎夷宿。自是金烏未發毛。
紈扇

樹頭風露咽玄蟬。錦褥新張竹簟捐。紈扇團團霜雪色。好藏篋笥待明年。
漫成二首

沉水香銷金博山。月滿樓臺深夜寒。瑤琴弦絕不可彈。葉落烏啼尋夢難。
江水如天月如水。落葉蕭蕭夜風起。一寸愁心千萬里。不見行人應未已。
詠史

六雄糜沸擾天綱。天下嗷嗷望禹湯。多事秦皇能一統。卻教人憶楚懷王。
天與聰明作大君。應天在實豈虛文。重瞳若解行仁義。不枉芒碭五色雲。
有感七首

物換星移事已迷。重來舊處惑東西。可憐如鏡天邊月。獨照棲烏半夜啼。
焚書千古訝嬴秦。迹難茫茫走縉紳。尚憶商山近京洛。白頭容得採芝人。

甲楯孤棲死不疑。那將宗社換西施。想應嘗膽秋風夜。恰似無忘檣李時。
鴻鴈來時月滿天。客途僮僕自相憐。荒村觸眼惟茅屋。榆柳蕭疎起暮煙。
黍稷高低菊有華。塵居恰似野人家。夕陽日向西牆過。只爲微生換鬢華。
魚鹽充物稻梁肥。誰寤繁華是禍機。日暮無人唁亡國。寒雅猶帶夕陽飛。
漫漫陽春不見秋。人生得意總忘愁。茱萸謝盡芙蓉發。清夜吹笙月滿樓。

送金華何生還鄉觀省 五首

金華山色翠亭亭。曾駐仙人白玉棊。羨汝結廬松柏裏。臥看鸞鶴下青冥。
尙想高人何北山。談經論道此山間。故家文物依然在。似汝須歸玉笥班。
漫漫東風吹綠蘩。行人江上發歸軒。想應今夜春山月。華髮蕭蕭正倚門。
樓外桃花紅錦披。當花把酒映花枝。慈親飲酒看兒笑。記摘桃花洗面時。
送兒出去望兒歸。看盡雛鴉弄夕暉。清曉開門兒卻到。蠨蛸飛上老萊衣。

春日雜興 八首

采石磯頭春水平。長干橋下暮潮生。誰能載酒尋芳草。楊柳堤邊信馬行。
過雨柔桑纒綬新。涵風細麥碧波勻。鳴鳩語燕聲相應。又是人間一度春。
春霧冥冥木葉稠。蒼鷹拂羽化爲鳩。莫將松桂夸桃李。柱下先生早白頭。
日自西馳水自東。落花飛絮總隨風。舊巢燕子今何處。煙雨庭臺似夢中。

花競嬌。草競芳。縱橫只是爲春忙。天桃穠李先飄落。不及薔薇與海棠。
細雨冥冥晝掩扉。更無芳草有垣衣。人生一世邯鄲夢。老病無眠夢亦稀。
雨隱滄江霧隱山。鄉關迢遞寄書難。病來只吟春風到。不擬春風曉更寒。
日出江空曉氣柔。白蘋風起渚煙收。夜來一餉三更雨。送盡飛花入海流。

題陳大初畫扇三絕

一道滄江隔戰塵。白蘋風起浪鱗鱗。新亭滿眼神州淚。未識中流擊楫人。
泛湖浮海兩如何。滿地悲風起白波。爭似乘槎隨博望。玉繩光裏看山河。
水淨沙明一葉紅。釣絲牽月過長川。五湖何地宜生理。我欲從之問計然。

七月七日

百年佳會幾今宵。脉脉相看一水遙。漫道天孫解專巧。卻教烏鵲爲成橋。

夜泊桐江驛

伯夷清節太公功。出處非邪豈必同。不是雲臺興帝業。桐江無用一絲風。

卽景二首

江城五月冷脩脩。細雨微風拂面愁。汀蓼不知猶是夏。競開丹粟滿枝頭。
薄寒輕雨細如絲。風滿長川棹去遲。漠漠野田將暝色。纖纖汀草欲青時。

御柳二首

御柳青青陰綠池。迎春擢秀不違時。皇恩天地同生育。雨露無私爾最知。漫漫春風入舜韶。綠楊舒葉乳鶯調。君王不爲娛聲色。無用辛勤學舞腰。

茗溪皇甫秀才幽居二首

玄晏先生一草廬。萬竿脩竹五車書。日高無客來驚夢。自謂公侯總不如。天目山前茗水流。野華啼鳥自春秋。滄浪清濁吾何預。坐聽松風笑許由。

遣興

萋萋芳草掩重門。幾樹斜陽照斷魂。坐愛微風起蘋末。月明簷鐸語黃昏。

梅花七絕句

風林凋盡碧琅玕。的皪梅花好自看。霜白月明殘雪夜。一枝危拂斗杓寒。羣山積雪慘晴曦。石裂玄冰萬木披。不是孤芳貞不撓。陽和爭得上枯枝。紫府仙人萼綠華。暫拋瓊苑到天涯。斷魂應化爲蝴蝶。夜夜歸來阿母家。稀疎寒玉小樓東。骨冷魂清五夜風。惟有翠禽憐寂寞。一雙相倚月明中。蕊宮仙子媿雲鬢。姑射神人薄鍊顏。借問高標誰得似。白頭蘇武在天山。瓊跗玉葉兩依依。搖落空山物色微。青女不知幽獨意。忍寒猶自妬芳菲。微陽穉綠未能還。四海昆蟲總閉關。只有梅花見天意。先將春色到人間。

雪中三首

簾下孤煙鬱曉炊。簷前寒鳥啄枯籬。瓊瑤滿地無行跡。正是袁安獨臥時。
一夜雪深一尺餘。平明烏雀噪堦除。移床漫向明牕下。圖得清光好照書。
漠漠隨風結遠埃。輕輕糝地集枯荑。春前有意呈三白。知是陽和次第來。
雪後遺興

朝寒布穀應時鳴。起向回廊獨自行。殘雪未消簷影寂。滿庭幽草看春生。
絕句二首立春夜聞蛙鳴作

鬼門竹管動輕灰。春色先從地底來。月落江城聞畫角。五更殘夢一時回。
輕輕細雪點枯池。嫋嫋東風拂樹枝。春到草根人未覺。夜來先有蟄蛙知。

絕句九首

異鄉風景不知春。滿地蒼苔一病身。睡起無人問幽獨。杜鵑聲在綠楊津。
花自飄零草自榮。何須惆悵獨關情。高軒日永成危坐。隔水風來聞鍛聲。
雨餘煙柳約青絲。風過芹塘澹碧漪。正是愁來無着處。綠陰庭館暮寒時。
一樹穠華半夜風。平明枝上十分空。黃蜂紫蝶紛紛去。留得蒼苔藉碎紅。
槐葉陰陰覆短牆。微風細雨麥秋涼。如何一歲三春景。不及閑牕午夢長。
淮水東邊舊六朝。瓊樓翠館白雲銷。于今只有垂楊柳。猶似當時舞細腰。
花落江臯宿雨晴。野煙消盡見蕪城。鳳簫一去無回日。不及年年綠草生。

天塹長江似海深。江頭山鬼笑埋金。東家釀酒西家醉。世上英雄各有心。
暖風吹帳日光遲。恰似清和四月時。黃鳥不知人懶起。未明啼上綠楊枝。

半山寺二首

王家廢寺舊聞名。荆棘花開鳥自鳴。深夜狐狸穿破塚。佛燈爭似鬼燈明。
奸邪變法事多端。氣燄興妖膽自寒。漫道諂諛堪媚佛。竟將佛作麼人看。

絕句漫興十一首

風光何故惱閑人。我欲乘槎一問津。滿地綠陰迷斷夢。五更啼鳥不勝春。
兔葵燕麥舊人家。曾唱南朝玉樹花。寒暑又隨風日轉。東陵誰種邵平瓜。
莫道花開便是春。莫言沙漲卽成津。南風過了東風起。愁殺江頭待渡人。
新鷺枝上語如絲。似與羈魂話所思。不用登樓看草色。白蘋香散已多時。
相思舉目萬重雲。燕去鴻來杳不聞。漫說黃金能得士。只今誰是望諸君。
五湖風雨夜垂綸。一葉扁舟一粟身。至竟雲濤歸大壑。煙波還屬釣魚人。
病客無錢試藥方。出門聊復信行藏。爭知頭上蕭蕭髮。卻與遊絲較短長。
池面新荷貼小錢。荷心點點露珠圓。開花結子應堪待。亂荇空萍正可憐。
嫋嫋江風轉白蘋。輕花亂蕊看成塵。誰能爇取生犀角。采石磯頭照水神。
日落羣山返照餘。槐陰夢覺夕陽初。夜閑不畏更籌短。收取流螢映讀書。

白鷺洲邊白鷺鷺。一雙相對立。襪襪日斜。隔水分明見。不分人間有別離。
漫成三首

八駿茫茫去不回。白雲歌曲使人哀。鯪魚風起鯨鯢湧。青鳥何由海上來。
瞿塘怒水激天風。回首童顏變老翁。落日長年鳴櫓過。白鷗飛出浪花中。
微涼生袂一登樓。落照歸鴉點點愁。誰似孤雲獨無事。隨風直到海西頭。
不雨遣悶二首

朝霞不作黃昏雨。暝靄徒爲白晝風。日上高林啼布穀。聲聲只在短牆東。
池上芹泥卽漸乾。梁間燕子拾蟲難。綠窗無限傷春意。看盡斜陽更倚闌。
雨餘

枯池得雨鬧羣蛙。蟹螯含漿總有家。爲愛微涼宜曉夢。不知晴日滿庭沙。
無題絕句二首

花自飄零水自流。無情有恨月如鉤。十年一枕三更夢。贏得風煙滿地愁。
後夜蛾眉約淺黃。河邊猶翳玉繩光。不知何處藤蘿上。全見姮娥一面粧。
春蠶

可笑春蠶獨苦辛。爲誰成繭卻焚身。不如無用蜘蛛網。網盡蜚蟲不畏人。
晚興

腐草餘光滅。又明微風不起。夕涼生。絕憐一餉池塘雨。只得青蛙半夜聲。

睡起

濃綠當軒日上遲。病身只與睡相宜。覺來卻恠莊周蝶。繞盡殘枝過別枝。

喜雨寄夏允中五絕

好雨知時五月零。豆苗瓜蔓一時青。老夫亦起中庭立。兩眼看天似醉醒。
隱隱輕雷不起風。濛濛密雨遍長空。枯根發秀新莖長。小草那知造化功。
換汗如蒸被體流。日高強起倦梳頭。多情一夜千山雨。消盡人間萬斛愁。
水鶴長鳴應九陵。山雲處處上如蒸。定知谷鮒從今後。不向西江乞斗升。
江暗天低雨腳垂。屋鳴簷瀉入枯池。卻憐似鏡新荷葉。不見魚跳鷺浴時。

無題

槐映高樓柳映墀。風來唯有鵲先知。長應別殿黃昏後。記得金宮妬寵時。

將曉

月落廳餘白練光。滿天清露結爲霜。東風可是無情思。吹出新楊一樹黃。

江行雜詩九首

采石江頭山插天。江泉激石鳴湘絃。十年戰血汚江水。水中鬼神應醉眠。
三生磯上星滿灘。白煙如雪浮林端。水妃夜解玉佩去。清淚滴成紅木難。

馬當之山中江中。其下乃是馮夷宮。良宵月出江。水底行人喜。甚天無風。
九龍山西。落日沉江。雲壓地生層陰。汀洲無人。蘆葉響。咆哮一聲。風滿林。
皖口孤城。江水傍。城上猶有愁雲黃。豺狼魍魅相食。盡忠魂。白日長。垂光。
桑落洲邊。春草生。宜城九醞空傳名。百年世事同醉夢。愁聽野猿啼。到明。
江盤峽束。雷彭浪。孤山如筆江中央。坤靈不放厚地裂。應有潮汐通扶桑。
長江水濁。湖水清。石鍾濤擊鯨魚鳴。山頭出雲山下雨。揚瀾左蠡何時平。
江州太守文儒宗。罵賊就死真從容。天翻地覆元氣在。斯人萬古其猶龍。

鍾山作十二首

紫桂吹香媚小山。月華的皪滿林間。坐來涼氣生虛室。知是山雲作雨還。
松露滴塔星在天。草蟲相弔響如絃。寶公塔上西風急。半夜林鴉不得眠。
九月江南葉未黃。空山松栢夜深涼。玄蟬且莫催徂景。留取幽蘭作晚香。
玄武湖中草自秋。石頭城下水長流。繁華過眼成今古。更與牛羊競一丘。
春去秋來榮復衰。花殘葉落總堪悲。誰能句曲山中去。乞取茅君一虎騎。
北斗闌干夜未央。鐘殘虛牖出天香。佛燈相對坐宵寂。墜露滿林生白光。
一炷清香一卷經。世間無事是山僧。何須更卓飛空錫。長使時人恨不能。
月落山空霧未開。風生咆哮虎響如雷。樹頭驚鵲相呼起。欲下還飛一百迴。

白鴈蕭蕭柿葉紅。野花開盡六王宮。空餘一道秦淮水。著意西流竟向東。
策杖登山信早涼。山花澗草總能香。捫蘿抱水歸來倦。不掃蒼苔臥石床。
嫋嫋西風散白蘋。冥冥落日起黃塵。青娥不分秋容寂。故染楓林似老人。
槁葉含風彈夜絃。螻蛄淒唳答寒蟬。雞鳴埭上繁華子。莫向秋霜惜盛年。

有感

浪動江淮戰血紅。羽書應不達宸聰。紫薇門下逢宣使。新向湖州召畫工。

題畫魚二首

爲愛濠梁樂有餘。故拈兔穎寫成圖。秋風忽憶銀絲鱸。腸斷松江隔具區。
九罭無人詠鱒魴。河墳有客歎牂羊。不知生意能多少。爭得鯤鱖滿尺長。

無題三首

一片浮雲萬里心。海波無底未爲深。虞淵險迫羲和疾。空使傍人詫鄧林。
玉樹沉沉結夜愁。金陵蔓草沒荒丘。誰言錦纜江都去。不見金陵蔓草秋。
黃鵠高飛雲路遐。野鳧謀食但泥沙。山中樗櫟年年在。看盡西風木槿花。

題墨菊

粲粲金英美可餐。九秋風露與清寒。墨君莫妬天然色。終遣靈均怨子蘭。

題沙溪驛

澗水彎彎繞郡城。老蟬鳴作車輪聲。西風吹客上馬去。夕陽滿川紅葉明。
過關九首

關頭霧露白濛濛。關下斜陽照樹紅。過了秋風渾未覺。滿山秔稻八閩中。
峻嶺如弓驛路賒。清溪一帶抱山斜。高秋八月崇安道。時見棠梨三兩花。
建溪激箭向南流。石齒如鋒鬪客舟。篙子踏歌渾不畏。行人遙望替生愁。
驛路高低度嶺關。堯離人語雜夷蠻。江花巧似駝茸白。山果渾如碼礮般。
飯浙香瓊酒激霞。驛亭到處只如家。征夫但恐咨詢闕。莫向天涯怨路賒。
漠漠輕雲結晚陰。依依斜日掛遙岑。炊煙忽起桑榆上。散作鮫綃抹半林。
道上黃埃撲馬鞍。汗流如水透中單。忽驚踈雨林梢過。急換羅衣更怯寒。
劍水悠悠南去深。黃茅苦竹自成林。日烘溪霧生秋瘴。風攪山霏作晝陰。
嶺上高秋生火雲。狂雷送雨忽紛紛。鷓鴣更叫空山裏。縱是無愁亦厭聞。

題畫紅梅

水晶宮裏玉真妃。宴罷瑤臺步月歸。行到赤城天未曉。冷霞飛上綠銖衣。

題扇面牡丹花

沉香亭畔月華流。掌上孤鸞鏡裏愁。舞罷春風卻回首。六宮紅粉總包羞。

題扇面荷花

玉井芙蓉紅粉腮。何人移向月中栽。高軒忽漫看圖畫。疑是昭陽曉鏡開。

秋日卽事十五首

秋風吹雨冷脩脩。塔下金錢爛漫愁。鴻鴈不來巢燕去。草蟲辛苦獨知秋。
楊柳新栽半出籬。夜深烏鵲自驚枝。露涼月淡空煙暝。啼到金雞報曉時。
九月東風露不寒。蟪蛄相慶語籬端。野人便擬開荒徑。剩種忘憂與合歡。
搖落江臯草滿煙。秋光何處不堪憐。夜涼銀漢低城闕。臥聽蛩聲似箏絃。
春華秋草兩悠悠。素髮多情卻滿頭。落葉自隨流水去。遠山空帶夕陽愁。
垂垂密雨鞦韆楊。點點青苔繪短牆。不是鴈聲天畔過。爭知今日是重陽。
秋氣蕭條宋玉悲。西風唯有鴈相宜。秦淮岸上青青草。想見繁霜未落時。
寒星無數月如鉤。槁葉呼風入敝裘。人世可憐唯有老。鏡中憔悴夢中愁。
掛壁青釭照不眠。相看到此亦堪憐。露寒霜重殘螢盡。腸斷秋風憶往年。
病眼昏昏四顧迷。獨行渾似雪中雞。花開葉落真成夢。愁聽門前過馬蹄。
槿華數樹夕陽時。收拾秋光在短籬。自紫自紅還自碧。祇應獨有暮蟬知。
滿天星月一庭煙。坐掩衡門思悄然。漫想明珠成薏苡。卻嫌黃菊似金錢。
疎雨鳴簷月在雲。馬蹄初歇夜將分。鴈行卻向城頭過。何處砧聲隱隱聞。
江上秋高暑未歸。照書猶有數螢飛。東風可是憐游子。不遣看天憶授衣。

北風吹鴈過蕭蕭。旅館青燈共寂寥。蓬髮一時成白雪。老來禁得幾秋宵。

題水墨海棠鸚鵡

隴山鸚鵡白霓衣。欲語誰聽只自知。漫漫東風吹不起。海棠花上立多時。

